

BAEBELE, MOKAPO YA MOTOBA ²



. . . Koyekola Liloba na Ye ya motuya.

Nakómi, kala mingi te, mpe namemaki ba-Biblia mibale. Mpe nazalaki na mwa lisolo moko ná mama moko awa, nayebisaki ye ete soki natayi uta na nyonso mibale, nasengeli kozala na liteya moko ya malamau mpenza. Kasi oyo ezali lexique ya Greki, boye, ezali kaka na eloko moko oyo nalingi kotanga kati na yango, na mpokwa oyo. Ezali—ezali. . . Ezali ndimbola ya liloba na liloba, longwa na Greki ya ebandeli, kino na Anglais. Mpe etikali kozala lisungi mingi mpo na ngai ntango nyonso oyo. Mpe nalingi bobele kotánga eloko moko uta na yango, mpo sikoyo tozoyekola Buku oyo ya Baebele, mpe sikawa tobandi kokóta na ba-ndimbola ya bozindo mpenza.

219 Mpe nayebisaki Ndeko Neville, eleki mwa miniti: “Tobandi kokóta na eteni oyo bato bamikwanzaka motó mpe balobaka: ‘Nandimi oyo wana te.’” Bomoni? Wana nde lolenge ya makambo oyo tobandi kokóta kati na yango. Wana nde esika oyo tolingaka yango.

220 Motei moko alobaki na ngai, alobaki: “Ee, nabanzi ete bato mingi bakomikwanza motó.”

221 Nalobaki: “Yango nde tolingaka kosala.” Bomoni?

222 Biblia ekoki bobele kozala na ndimbola moko. Ekoki kozala na ndimbola mibale te. Mpe soki eteni moko ya Biblia elobi eloko moko, mpe eteni mosusu ya Biblia elobi eloko mosusu, na bongo eloko moko ezali kotambola malamau te. Bomoni? Esengeli koloba ndenge moko, ebandeli kino nsuka. Kasi, bóbosana te, na koyekoláká Biblia: “Ebombami na miso ya bato na bwanya mpe ya mayele, mpe emonisami na bana mike,” mpo ezali ya Buku moko ya molimo.

223 Mpe ezali buku ya mikili ya poto te. Ezali Buku ya bato ya esti. Mpe eloko bobele moko ekoki kolimbola Yango, mpe ezali nde Molimo Mosanto. Nayebi ete moko na moko na biso, tolingaka koloba, ete: “Molimo Mosanto nde ayebisaka biso makambo oyo tondimaka na Yango.” Ee, sikawa, soki Makomi nyonso elandani na kolongobana mpenza, na bongo, oyo wana ezali Molimo Mosanto. Soki ezali kolongobana te, mpe ezali na kokoso *awa*, mpe kokoso *awa*, na ntango wana, eloko moko ezali malamau te ná kondima na biso. Mpe, oh, Ezali Buku moko ya malamau mingi.

224 Sikawa, nalingi ete bósala boye wana tozoyekola. Sikawa, to sengeli kolongwa na ntongo-ntongo mpo na kokende na Wyoming, soko Nkolo alingi. Bóbondela mpo na biso.

Mpe na mposo oyo ya nsima, Ndeko Graham Snelling, awa . . . Azali wana. Nauti koyoka ye, eleki kaka mwa miniti, ntango azalaki kopesa liyebisi na ye. Mpe losambo oyo ezali na boyokani na mobimba nyonso ná mayangani na ye ya kolamuka. Mpe tozali kobondela Nzambe, ete ápesa ye mayangani ya kolamuka ya libanda na momesano mpe ya bofuluki. Ndeko Graham asalaki mayangani ya kolamuka mpo na Ndeko . . . awa na Charlestown, Ndeko Junior Cash, mpe bato koleka mokama, nabanzi, babongolaki motema. [Ndeko moko alobi: “Ntuku mwambe na minei.”—Mok.] Bato ntuku mwambe na minei babongolaki motema. Boye, na yango, topesi Nzambe lokumu. Mpe totii motema ete bakozala nkama mitano na ntuku mwambe na minei awa, na esika oyo awa.

²²⁵ Ndeko Graham akutanaki na ngai lelo, mpe alobaki: “Sikoyo, Ndeko Bill, nandimisami ete ososoli ete naye awa te mpo na kobandisa mosala mosusu oyo ekotemela tabernacle, mpo nazali eteni na tabernacle.” Azali awa bobele mpo na . . . Azali koyoka na motema na ye ete alingi kosala mayangani ya kolamuka, mpe Nkolo azali kokamba ye mpo na kosala yango. Mpe—mpe azali kobengisa baoyo bazali kobongola motema, mpe azali na losambo moko, epai akosopa bango na mbala moko: “Oyo ezali ndakonzambe moko, soki okoti awa, soki obongoli motema.”

²²⁶ Mpe ezali lotómo na biso, lokola Baklisto, ya kozala nsima na ye na nyonso oyo tokoki kosala. Mpe Nkolo ápambola Ndeko Graham. Mpe bino, moto nyonso, bobengisami na boboto nyonso, na mayangani ya Ndeko Graham, awa, ná ndingisa mobimba ya losambo oyo, ná boyokani mobimba mpo na kosunga ye na ndenge nyonso oyo tokoki kosunga ye, mpo na milimo oyo ebúngá mpe mpo na Bokonzi na Nzambe.

²²⁷ Nkolo ápambola yo, Ndeko Graham, ápesa yo mayangani ya malamú mingi. Ayebi mokolo akosilisa te. Azali nde kobanda. Na boye, Ndeko Graham asílá koleka na yango, lokola ngai moko, na makambo mingi ya *matá-kitá*. Ndenge wana nde bomoi ekendeke. Esalaka ete ósepela na makambo ya *matá*, nsima na koleka na makambo ya *kitá*. Soki moto akwei mpe atikali wana, azali goigói. Natielaka moto motema soki atelemi mpe ameki lisusu. Ya solo. Nandimisami ete bokoki kolimbola oyo nalingi koloba. Sikawa, bóbosana yango te, na mpóso oyo ekoya.

²²⁸ Sikawa, na Buku oyo ya Baebele, tokozongela yango te, na mpokwa oyo.

²²⁹ Sikawa, Lomingo ekoya, soko Nkolo alingi, Ndeko Neville akopesa liyebisi. Ndeko Cox awa, to bandeko mosusu, bakoyebisa ye, soki tozongi na ntango malamú mpo na liyangani ya Lomingo ekoya. Akoyebisa yango na radio. Mpe tozali . . . Bino nyonso bólándá ye na radio sikoyo, mpe—mpe—mpe bóbensisa bazalani na bino mpo báyoka. Nasepelaka mpenza koyoka

mateya mpe banzembo na bango, ba-Neville minei. Nazoloba yango te mpo afandi awa. Soki nalobi yango, mpe euti mpenza na motema na ngai te, nalingaki kozala mokosi. Ya solo. Ekosengela náyambola. Kasi nalobi yango na motema mpenza. Mpe malamú nápesa ye mwa fololo rose sikawa, na esika ya kopesa ye liboke mobimba nsima na ye kokende.

²³⁰ Mokolo moko nazalaki kobima na ekuke, mpe mama moko apusanaki, mpe alobaki: “Ndeko Branham, oh, ndenge nasepelaki mpenza na liteya wana!”

²³¹ Nalobaki: “Matondi.” Esalaki ete námiyoka malamú.

²³² Moto mosusu apusanaki, alobaki: “Ndeko Branham, nasepeli na liteya wana.”

²³³ Nalobaki: “Matondi.”

²³⁴ Ezalaki na mwa motei moke kuna, autaki awa na ngambo ya nordi ya mboka, na etuka, alobaki: “Nzambe ápambolama, nalingaka te ete bato báikumisa ngai ndenge wana.”

²³⁵ Nalobaki: “Ngai nalingaka yango.” Mpe nalobaki: “Bokeseni ezali bobele moko kati na ngai na yo. Ngai nazali sembo na likambo yango.” Ya solo. Bisó nyonso tolingaka koyoka maloba ya malamú kolobama na ntina na bisó. Mpe na—nabanzi ezali malamú koloba maloba ya malamú na ntina na yango. Mpe soki olingi ete moto áloba maloba ya malamú na ntina na yo, lobá mwa maloba ya malamú na ntina na moto mosusu. Wana nde ndenge ya kosala yango, bongo okobanda ntango nyonso koloba makambo ya malamú koleka mpo na bato nyonso. Mpe yango ekosala ete mayika ébaluka malamú koleka.

²³⁶ Sikawa, mpo na mokolo ya lomingo oyo ekoya, soki Nkolo alingi, mpo na ngai, tosili, tozali kaka kozinda se kozinda na kati ya mabombami minene ya Nzambe. Tokolobela Melekisedeke: Nani Ye azalaki, epai wapi Ye autaki, epai wapi Ye akendeke, likambo oyo ekomelaki Ye, mpe nyonso na ntina na Melekisedeke.

²³⁷ Mpe sikoyo, mokolo ya misato eleki na mpokwa, Ndeko Neville akómaki na mokapo ya nsuka, na ntina na Bonzambe eleki likoló mpe bonganga ya Nkolo na bisó Yesu Klisto, oyo ebandi na ebandeli: “Nzambe, na ntango ya kala mpe na ndenge mingi asolóláká na batata na nzela na basakoli, na ntango oyo ya nsuka alobi na bisó na nzela na Mwana na Ye, Klisto Yesu.”

²³⁸ Na bongo akobi, mpe abandi koloba mpe kotalisa Nani Ye azalaki, amemi Ye kino na mokapo ya 5, na nsuka ya mokapo ya 5.

²³⁹ Na nsima kobanda na mokapo ya 6, toyekolaki yango na liteya na bisó ya ntongo ya lelo.

Boye totika makambo mikemike ya malakisi ya Klisto, tokende kino na bobongi be; . . .

240 Bato boni basepelaki na liteya na ntina na bobongi be? [Losambo balobi: “Amen.”—Mok.] “Tókende kino na bobongi be.” Yango nde ezalaki liteya na biso, na ntongo ya lelo, na mokapo ya 6 ya Baebele.

241 Sikawa tozokóma na esika oyo tobandi kozwa e—eteni ya solosolo. Oh, biso nyonso tokoki koyokana na makambo oyo: na Bonzambe ya Klisto; ete Ye azali Mwana na Nzambe; mpe ndenge Azalaki elongo ná Nzambe, mpe Nzambe azalaki elongo ná Ye; mpe Ye azalaki kati na Nzambe, mpe Nzambe kati na Ye, mpe bongo na bongo. Bisu nyonso toyokanaka na oyo wana. Kasi, sikawa, kobanda awa kokende liboso, nayebi te ndenge nini tokoyokana. Boye, ézala ata soko nini, na mpokwa nyonso, tokopesa bino libaku ya kokomela ngai mwa mokanda mpo na bóyebisa ngai oyo bokanisi mpo na yango.

242 Na bongo ekosengela náyanola na mituna. Mpe soki nakoki yango te, nakoloba: “Ndeko Neville, okanisi nini mpo na yango?” Nakoloba: “Ye wana. Tótika ye áyanola yango.” [Ndeko Neville alobi: “Na ntango wana nde nakotángá Greki.”—Mok.] Na ntango wana nde akotángá lexique yango, nde akobimisa Greki. Nakanisi ete ntango ekoki mpo na ngai kosala yango, mpe.

243 Kasi, sikoyo, soki tomikitisi mpe tozali mpenza sembo, mpe toyei mpenza na ntina bobele moko, elingi koloba, koyekola. Ngai mpe nalingi koyekola. Mpe Biblia ekomami, elobi: “Ezali. . . Makomi ekoki kolimbolama na moto moko te.” Elingi koloba Likomi nde esengeli kolimbola Likomi. Bomoni? Likomi moko na moko esengeli kolimbola mosusu, na Biblia mobimba, mpo na koyeisa yango eloko bobele moko ya monene. Mpamba te, Nzambe akoki kobongwana te, mpo Azali Nzambe oyo abongwanaka te.

244 Sikawa: “Tótika. . .”

Yango wana tótika makambo mikemike ya malakisi ya Klisto, tokende kino na bobongi be; . . .

245 Nalingaka Paulo koloba makambo yango. Paulo atikálá te kozala moto oyo alingaki kotikala ntango molai te na esika moko. Azalaki kolinga kokende liboso, na bozindo koleka. Mokolo moko, na Likomi, alobaki: “ezali ngai kobosana makambo oyo masili koleka, nazali kobila kino nsuka mpo na libonza na ebiangeli ya likoló.” Bomoni? Azali kokóba kobila kino nsuka.

246 Awa alobaki:

Sikawa tóbosana makambo mikemike ya malakisi ya Klisto (Nani Ye azalaki, nini Ye azalaki), tókende kino na bobongi be; . . .

247 Sikawa, biso, liboso, tolingaki koyeba: “Tokoki nde *kobonga be?*” Mpe tomonaki, na Makomi na ntongo ya lelo, na Matai 5:28,

ete Yesu alobaki ete biso “tosengeli mpenza kobonga be lokola Nzambe,” soki te, tokokóta te.

²⁴⁸ Na nsima tomonaki ete biso, moko na moko “tobotamaki kati na lisumu, totongamaki kati na lisumu na nko, toyaki na mokili kolobáká lokuta.” Mpe tozalaki ata na eloko moko ya malonga te, boye ndenge nini tokokaki mpenza kobonga be?

²⁴⁹ Sikoyo tomoni lisusu boye, ete, na kotangáká, wana tozwi Likomi ná Likomi, ete: “Yesu, na nzela na mbeka bobele moko, abongisaki be, mpo na libela, Lingomba na Ye.” Ye . . . Na bongo tobongi be, na nzela na Klisto. Mpe tozui bonsomi longwa na kosambisama, na nzela na Klisto. Tokokufa te, na nzela na Klisto. Tobungisi kufa mpe tozui Bomoi, na nzela na Klisto; na nzela na lingomba moko te, na nzela na denomination moko te, na nzela na eloko moko ya kokamwa te, na nzela na koloba minoko na sika te, na nzela na koganga te, na nzela na koningana te, na nzela na kobina na Molimo te, kasi nzela na ngolu.

²⁵⁰ Nzambe abengaka nani Ye alingi. Mpe nyonso ezali na nzela na boponami, ndenge tomoni. Tomoni, ete: “Ezali te ye oyo alingi kobikisama. Ezali te ye oyo alingi to ye oyo apoti mbangu; ezali nde Nzambe oyo akosalaka mawa.” “Mpe moto moko te akoki koya epai na Yesu soko Nzambe abendi ye liboso te.” Bongo, eloko nini bosengeli kosala ná yango, ata bongo? Ozali na eloko ya kosala te ná yango. Etali yo ata moke te, na nyonso.

²⁵¹ Tomonaki ete moto atikálá koluka Nzambe te. Nzambe nde alukaka moto. Na bongo tomonaki, ete Nzambe nde liziba bobele moko ya Bomoi na Seko. Tomonaki ete nyonso oyo ezali ya Seko ezali na ebandeli te to nsuka te. Yango wana, tomoni ete lifelo ezalaki na ebandeli, mpe ezali na nsuka. Mpe ezali bobele na . . . Moto moko te akoki koloba mokolo moko, ete lifelo ezali mpo na libela; mpo na libela, iyo, mpo na libela, kasi ya Seko te.

²⁵² *Libela* ezali “ntáká ya ntango.” Biblia elobi: “Libela na libela.” Bóluka yango mpo bótala soki *libela* elingi koloba “ntáká ya ntango” te. Yona alobaki ete azalaki kati na libumu ya mbisi-monene mpo na “libela.” Mpe Makomi ebele mosusu, *libela* elingi kaka koloba “ntáká ya ntango.”

²⁵³ Kasi, *Seko*, ezali “libela”; elingi koloba libela na libela na libela na libela na libela. Ezali ya Seko. Mpe tomoni ete lifelo ezali Seko te, kasi ezali libela. Mpe ntina yango nde bosengeli kokeba na maloba yango, sikawa. Soki te, bokobulungana. Sikawa, bomikanisela, bobele biloko oyo ezalaki na- ebandeli te nde ezali na nsuka te. Na yango, Yesu alobaki: “Ye oyo akoyoka Maloba na Ngai mpe akondima Ye oyo atindi Ngai, azali na Bomoi,” mpo na libela? Eyokani malamu? Te. “Azali na Bomoi ya Seko.” Mpe liloba oyo *Seko* elingi koloba “Nzambe.” Liloba oyo, yango oyo awa na lexique ya Greki: *Zoe*, “Bomoi ya Nzambe” kati na yo. Mpe ozali mpenza Seko ndenge Nzambe azali Seko, mpo ozali na Nzambe kati na yo.

254 Lolenge na yo ya kala ekufá, lolenge ya mokili, mpe okómi ekelamu ya sika. Mpe bamposa na yo, bomoi wana ya kala, oyo ezalaki na ebandeli, ntango Nzambe apemaki mpema na madusu ya zólo na yo, ntango obotamaki, bomoi wana ya lolenge ya mosuni ezalaki ya kokufa. Ezalaki na ebandeli mpe ezalaki na suka, ekufaki mpe elongolamaki mpo na libela, lolenge ya kala. Mpe Nzambe akotaki na Lolenge ya sika. Na bongo, bolingo, esengo, kimia, motema molai, bolamu, kimia, motema molai, mpe bopolo, mpe boboto, nde ekotaki; mpe ezwaki esika ya mayele mabe, ya botomboki, ya koyina, mpe—mpe ya kowelana, ya koswana, mpe ya makambo nyonso wana. Ezwaki esika na yango, ntango olekaki longwa na kufa koingela na Bomoi. Bososoli yango, na bokengi mpenza, sikawa? [Losambo balobi: “Amen.”—Mok.]

255 Boye, bóyoka. Ezalaka na lolenge bobele moko ya Bomoi ya Seko. Bóluka Yango. Yango ezali, bobele Nzambe nde azali na Bomoi ya Seko. Biblia elobi bongo. Bobele Nzambe nde azali na Bomoi ya Seko. Mpe soko moto moko akonyokwama na lifelo, mpo na libela, asengeli kozala na Nzambe, ya Seko. Kasi nalobi ete kuna . . .

256 Sikawa, bóbosana te, nalobi te ete lifelo oyo epelaka móto ezali te. Lifelo oyo epelaka, móto mpe sufulu, ezali. “Epai nku—nkusu ezali. . . móto ezimisamaka te mpe nkusu ekufaka ata moke te,” ya móto mpe sufulu, etumbu. Ekoki koumela mibu miliar nkama na nkama. Kasi esengeli kozala na nsuka, mpamba te lifelo ekelamaki mpo na zabolo ná banje na ye. Mpe nyonso oyo Nzambe mpenza, Ye moko, oyo azalaki na ebandeli, biloko nyonso eutaki na Nzambe. Ntango Molimo mpenza . . .

257 Zua bobele *Molimo* ya bolingo, oyo ezalaki liziba monene ya Nzambe, ya peto, oyo esangisami te. Uta na yango, nde bolingo oyo *ebebisami* euti. Na nsima ekiti na bolingo ya *bato*. Na nsima ekiti na bolingo ya *kosangisa nzoto*. Na nsima ekomi ba-bolingo mosusu, ba-bolingo mpe ba-bolingo, mpe ezali kaka kokóba kobebisama kokita kino ekomi mpenza *bosoto*. Kasi nyonso wana ezalaki na ebandeli. Mpe mokolo moko ekozonga mbala moko kino na oyo ya ebandeli; ezali ya Seko; mposa ya nzoto, bolingo ya bato, bolingo ya mposa makasi, ba-bolingo nyonso wana ekosengela kosuka.

258 Kondima nyonso ya maloba ekosengela kosuka. Kondima ya solo ezali bobele moko. Nyonso mosusu ekosengela kosuka. Ebebisamaki longwa na liziba oyo ya solosolo.

259 Boye, na yango, lifelo, mpasi, mpasi ezali ya Seko te. Mpasi eyaki mpo na lisumu, mpe lisumu ekotisaki mpasi. Mpe ntango lisumu ekosila, mpasi mpe ekosengela kosila. Mpe ntango moko ekozala, oyo basumuki oyo batikálá koyamba Klisto te, nsima na bango kozua etumbu ntango mosusu mpo na mibu miliare mokama, . . . Nayebi te, ntango mosusu mpo na mibu nkáma

zomi ya milio na miliare. Nayebi te. Kasi ekosengela kokoma na nsuka, na ntango moko boye, mpamba te ezali Seko te.

²⁶⁰ Sikawa, tokokende mbangu sikawa, kino na bobongi be. Sikoyo báyoka, awa tozali kobanda Liteya.

. . . na botiaka lisusu moboko te ya mbongwana na motema longwa na misala na kufa, mpe longwa na kondima epai na Nzambe,

Ya malakisi ya libatisi, . . . kotiela maboko, . . . lisekwa ya bakufi mpe . . . kosambisama ya seko.

²⁶¹ Sikawa báyoka. Tozali na mibale. . . Tozali na elili moko awa, sikawa. Sikoyo awa nde esika tokoyokana mpenza te. Sikawa bosengeli komona esika elili yango ezali. Awa, Paulo azali koluka kokabola *mobeko* na *ngolu*. Tozali na bilili mibale: moko, ya nzoto; mosusu, ya molimo. Mpe Paulo azali koluka ko—kokabola kati na yango mibale, mpo na kotalisa Bayuda. Mokanda oyo etindami epai na Baebele. Mpe Baebele mobimba ezali koluka kotalisa ete ndakisa ya Kondimana ya Kala ezali elilingi ya oyo ya Sika. Boye, bozali na bilili mibale awa ya kotala malamau.

²⁶² Sikawa báyoka na bokebi wana tozali kotánga. Sikawa alobaki:

. . . tótika makambo mikemike ya malakisi ya Klisto, tókende kino na bobongi be; . . .

²⁶³ Sikawa, tomonaki yango na ntongo ya lelo, ndenge tobongi be. Ya kobonga be, kozanga mpenza litónó mpe mpámelá, lisumu moko te likolo na biso. Bozali nde likoló ya komekama? Ata moke te. Bosumukaka mikolo nyonso? Iyo, misie. Kasi, ata bongo, tobongi be mpo tozali kati na Ye. Mpe Nzambe akoki lisusu kosambisa biso te (ekoki kozala boyengebene te), Asili kosambisa biso kati na Ye. Ntango Asambisaki Klisto, Asambisaki ngai, Asambisaki bino. Mpe Akoki lisusu kosambisa ngai te, mpo Azwaki kosambisama na ngai soki nasíli kosikolama.

²⁶⁴ Mpe nazali na tiké mpo na kotalisa ete nasílá kosikola saa na ngai na ndako ya kodéfisa, bongo moto moko ámeke kozongisa yango na ndako ya kodefisa, na ntango oyo nazali na tiké. Nasílá kosikola yango.

Mpe soki zabolo ameki kopesa ngai etúmbu, nazali na tiké oyo ezali kotalisa ete nasílá kosikolama. Iyo, misie. Kosambisama ezali lisusu te! “Ye oyo akoyoka Maloba na Ngai, mpe akondima na Ye oyo atindi Ngai, azali na Bomoï ya Seko, mpe akokoma na esambiseli ata moke te, kasi asili kolongwa na kufa mpe kosingela na Bomoï.” Yango nde tiké na ngai. Apesaki elaka.

²⁶⁵ Sikawa, sikawa, elili yango, awa.

...totika naino kotia miboko na kobongwana na motema longwa na misala na kufa, mpe...kondima epai na Nzambe,

...malakisi ya libatisi,...kotيامa maboko,... lisekwa ya bakufi, ...kosambisama ya seko.

²⁶⁶ Sikawa, bomikanisela. Bomoni liloba oyo basaleli lisusu? Tosalelaki yango na ntongo ya lelo: “Kosambisama ya Seko.” Ntango Nzambe alobi mbala moko, Ezali ya Seko. Ekoki kobongwana ata moke te. Boye, kosambisama ezali ya Seko, ezali ntango nyonso kosambisama. Mpe ata soko tozali kobika na ekeke nini, ekeke moko ekobika, mpe mobeko moko ekobika, mpe ezali mpo na libela, to mpo na ntango boni, mpe oyo, mpe oyo *kuna*. Kasi kosambisama ya Nzambe ezalaka ntango nyonso ya Seko, Asengeli kosala bongu, mpo Alobaki Liloba. Ntango Nzambe alobi Liloba moko, Esengeli kozala ya Seko. Ya solo.

²⁶⁷ Sikawa nakotangela bino yango na Greki. Bóyoka ndenge elobi.

Boye tótika—tótika makambo mikemike ya malakisi ya Klisto, Oyo asalelami mbondi, tosengeli kopusana—kopusana kino na . . .

Sikawa, nazokoka kotanga yango te. Ezali komonana malamau te. “Kozanga kotia lisusu lolenge. . .” Yango oyo.

. . .kozanga kotia lisusu lolenge ya mibeko longwa na misala mikoyeisaka kufa.

²⁶⁸ Sikawa, lexique oyo epesi mpenza ndimbola moko te, ata moke te. Ezali kaka liloba ya Greki ya oyo Ngelesa elobi. Mpe elobi: “Sikawa tolingi te. . .” Bóyoka awa, bomoni.

. . .kozanga kotia mibóko ya mibeko longwa na misala mikoyeisaka kufa.

²⁶⁹ Sikawa soki bokoki kosimba yango na makanisi na bino, ete azali koloba awa, ete: “Ndenge ya mibeko oyo eyeisaka kufa.” Paulo alobaki: “Kotika makambo mikemike, kokende na bobongi be, tótika naino kotia moboko na kobongwana na motema longwa na misala ya kufa mpe kondima epai na Nzambe: malakisi ya libatisi, kotيامa maboko, lisekwa ya bakufi, kosambisama ya Seko.” “Mibeko ya nzoto eyeisaka kufa,” nde ezalaki maloba oyo esengeli. Yango mpenza nde oyo Paulo akomaki. Bomoni oyo azali koluka kosala?

²⁷⁰ Sikawa, makambo nyonso oyo, ndakisa libatisi: moko abatisami na nsima, mosusu na liboso, moko na nkombo ya Tata, Mwana mpe Molimo Mosanto, mosusu na nkombo Yesu, moko ndenge oyo, mpe ndenge oyo *wana*, mpe makambo mikemike ya ndenge na ndenge ya libatisi.

²⁷¹ Mpe ya kotيامa maboko: “Nzambe ápambolama, nazali na likabo ya kotielá bato maboko. Aleluya! Yo, okoki kozua Yango *boye*. Aleluya!”

272 Kotia nyonso wana pembeni, mpo ezali misala ya kufa, mibeko oyo, kosala mibeko. Bomoni? Azali kolobela etonga mosusu. Sikawa alobaki: “Tótika yango, mpe tókende na bobongi be.” Bososoli Yango? [Losambo balobi: “Amen.”—Mok.]

273 Kasi lingoma ezali naino kolekisa ntango na makambo wana. Yango nde bazalaki koluka kosala. Lingomba ya Baebele oyo ya ebandeli ezalaki koluka koloba: “Ee, nabatisamaki na kozindisama na mai, mpe—mpe nazwaki *oyo*, mpe *oyo wana*, mpe makambo *oyo* nyonso.”

274 Alobaki: “Sikawa, bótia nyonso wana pembeni, bótika yango na nsima.” Kasi, sikawa, alobaki ete tosengeli kosala yango te? Sikawa bóyoka oyo alobaki mpo na yango.

Mpe tokosala bongo, . . . soko Nzambe akopesa njela.

275 Mpe oyo ya ebandeli elobi ndenge moko.

Tokosala yango, soko Nzambe akopesa biso ndingisa, bomoni.

Tokosala yango, soko Nzambe akopesa biso ndingisa.

276 Mabátisi, kotiyama maboko, mpe nyonso wana, kasi yango ebongi be te. Ezali kaka mibeko ya mosuni. Mpe wana nde esika mangomba etikali, lelo, na mibeko ya mosuni wana. Moko na bango alobaki: “Oh, ee, mai, liloba oyo *libatisi* elingi koloba *oyo* mpe elingi koloba oyo *wana*.”

277 Mpe basali bibongiseli: mpe moko amwangisaka mai, mosusu asopaka yango, mosusu abatisaka elongi na liboso, mosusu na nsima, mpe makambo nyonso wana; bamosusu kati na bango batielaka babeli maboko, bamosusu basalaka bantómá, mpe bomosusu basalaka basakoli mpe bongo na bongo, na kotieláká bango maboko; mpe koteyáká lisekwa longwa na bakufi, mpe ezali mabe te; mpe Bonzambe ya likoló ya Klisto, ezali mabe te. “Kasi,” alobaki, “nyonso wana ezali mibeko ya nzoto. Tozali kaka na mibeko. Sikoyo tokende kino na bobongi be.” Bososoli elili yango? [Losambo balobi: “Amen.”—Mok.]

278 Sikawa bótala malamumu. Awa nde esika eteni ya bozindó eyei sikawa.

Zambi ekokoka te mpo na baoyo basilaki kongengelama, mpe baleti likabo na likoló, mpe kosangana na Molimo Mosanto,

Mpe bayoki elengi ya liloba kitoko ya Nzambe, . . . nguya ya mokili mokoya,

Soko na nsima bakopengwa, mpo na kozongisa bango na kobongwana na motema lisusu; komonaká ete bazali kobakisa Mwana na Nzambe na ekulusu bango moko lisusu, mpe koyokisa ye nsoni.

279 Sikawa, nayebi oyo bino bato ya mibeko bozali na yango na makanisi sikawa mpenza, kasi bozali na libunga. Bomoni?

Malamu. Natelemi likoló na yango, mpe Biblia etatoli yango, ete: “Soki Nzambe abikisi moto, abikisami mpo na ntango mpe mpo na Seko.” Bokoki kolobisa Yango ndenge mosusu te.

²⁸⁰ Moto moko ya mibeko ayaki epai na ngai, eumeli mingi te, mpe alobaki: “Nakangi yo na likambo moko, Motei Branham. Nakangi yo na likambo moko. Olobaki: ‘Soki moto abikisami, akoki lisusu kobunga te?’”

²⁸¹ Nalobaki: “Yango nde oyo Nzambe alobaki.”

²⁸² Alobaki: “Nalingi kotuna yo likambo moko. Saulo azalaki mosakoli, mpe asakolaki. Mpe oyebi ete azalaki mopakolami ya Nzambe. Biblia elobi ezali bongo. Mpe amibomaki, mpe abungaki.”

²⁸³ Nalobaki: “Ya solo?” Nalobaki: “Biblia elobi ete ‘abikisamaki.’ Nsima na ye kokoma monguna ya Nzambe, azalaki kaka moto oyo abikisami. Biblia elobi azalaki bongo. Mpe, nsima na nyonso, amibomaki te. Mofilisitia moko nde abomaki ye, mpe Dawidi abomaki Mofilisitia yango mpo abomaki ye. Akweaki likoló na mopanga na ye, likongá na ye, mopanga, kasi, asalaki yango. Ebomaki ye te. Mpe Mofilisitia moko nde abomaki ye. Na bongo, ntango Saulo akendeki epai ya mwasi na soloka, mwasi yango abengaki molimo na Samwele, mpo akotaki naino na Nkembo te, azalaki na paladiso na nsé ya makila oyo esopanaki, ya ba-ngombe mpe ba-ntaba, oyo ekokaki kolongola masumu te. Kasi asengelaki kozala na esika moko ya kozela, oyo ebengami paladiso, kino ete ákota.”

²⁸⁴ Na esika wana nde bino bato ya Katoliko bozuaka mobulu. Bomoni? Sikawa, paladiso ezali lisusu te. Tokendeke mbala moko liboso na Bozali ya Nzambe.

²⁸⁵ Mpe ntango mwasi ya soloka ya Ene-dolo abengaki molimo na Samwele, atelemaki wana. Akweaki elongi na nsé, mpe alobaki: “Mpo na nini okosi ngai?”

²⁸⁶ Mpe Saulo atelemaki wana kaka te...Nalingaki koloba Samwele, na bilamba na ye ya mosakoli, azalaki kaka mosakoli. Alobaki: “Obimisi ngai na bopemi na ngai mpo na nini,” alobaki, “komona ete okomi monguna ya Nzambe?”

²⁸⁷ Alobaki: “Ee, Urimi elingi lisusu koloba na ngai te. Mosakoli akoki lisusu kosakola mpo na ngai te. Nakoki mpe kozwa ndoto te.”

²⁸⁸ “Boye,” Samwele alobaki, “okómi monguna ya Nzambe. Kasi lobi etumba ekobaluka, mpe okokufa lobi. Mpe na ngonga oyo, lobi na mpokwa, okozala elongo na ngai.” Soki Saulo abungaki, boye Samwele mpe abungaki, bango nyonso mibale bazalaki elongo. Na ntembe te. Biblia elobi bongo.

²⁸⁹ Sikawa, okoki komemama na kotuntuka, na kolobáká minoko na sika, kogangáká, koningana-ningana, kolenga, komata-kokita na lombangu na kati na ndakonzambe.

Natelemeli yango te. Kasi okoki komindimisa ete obikisami, na ntango oyo ezali bongo te, obikisami te. Bomoi na yo ekotalisa polele oyo yo ozali. Yesu alobaki ete ekozala bongo: “Bokoyeba bango na mbuma na bango.” Bomoi na yo ekotalisa polele soki obikisami to te, ata soki otikalá kofungola monoko te. Ekotalisa polele oyo yo ozali.

²⁹⁰ Kasi komemama mpe liyóki nyonso oyo ná kokóta na lingomba: “Mpe nabatisamá na Nkombo na Yesu, aleluya, nayebi ete nazali na Yango,” yango elingi koloba eloko moko te.

²⁹¹ “Nabatisamá na nkombo na Tata, Mwana, Molimo Mosanto, elongi na liboso, mbala misato. Nazali na Yango.” Yango elingi koloba eloko moko te.

²⁹² Paulo alobaki: “Tókende nde kino na bobongi be.” Tozali kolobela oyo abongi be. Mpe soko toluki-luki, bokomona ete oyo abongi be ezali Baponami. Nakotalisa bino yango polele, nsima na miníti moke, na nzela na Biblia. Ezali Baponami oyo Nzambe, liboso na kozalisama ya mokili, amonaki moko na moko na bango. Mpe Atindaki Yesu mpo na kosikola bato yango, mokili mobimba te. Alingaki kosala yango, kasi Asengelaki kofungolela baoyo nzela. Mpe lolenge bobele moko oyo Akokaki kosala yango, ezalaki kotinda Klisto; mpo Ákoka koya, mbondi ya masumu na biso, ete baoyo baponamaki, Ákoka komema bango epai na Ye, na Nkembo.

²⁹³ Bokoki kokanisa Nzambe átambwisa mosala na Ye na lolenge ya zololo mpenza, lokola mpo na koloba: “Ee, ntango mosusu moto moko akoyokela Ngai mpenza mawa, ntango mosusu akoya mpe akobikisama?” Nzambe asengeli te kobondela yo mpo ósala eloko. Kobondela nyonso, yo nde ozali na ntina ya kobondela, Nzambe te.

²⁹⁴ Na bongo, Klisto akufaki mpo na kobikisa baoyo Nzambe, na boyebi makambo liboso, aponaki bango mpo bákutana na Ye kuna, kozanga litónó to liutá. Liboso na kozalisama ya mokili, Amonaki yo na Nkembo. Yango nde oyo Biblia elobi, Baefese, mokapo ya 1. Mokapo ya 5, molongo ya 1. Nzambe abongisaki liboso na boyebi makambo liboso.

²⁹⁵ Sikoyo, soki Nzambe asalaki yango, abongisaki biso liboso na kozalisama ya mokili, mpe ayebaki moko na moko na biso na nkombo, liboso na kozalisama ya mokili, mpe aponaki biso mpo na Bomoi na Seko, mpe atindaki Yesu Klisto mpo na kosikola biso, yango, eleki mibu nkoto motoba, Amonaki biso, mpo tókoka komonana mpo na lokumu na Ye kati na Nkembo, ndenge nini okoki mpenza kobunga?

²⁹⁶ Sikawa, soki obikisami, obikisami. Soki Nzambe abikisi yo na mpokwa oyo, koyeba ete Akobungisa yo nsima na mibu zomi kobanda lelo, Azali kotelemela mwango na Ye moko; Nzambe oyo azali na nsuka te, Oyo-na-Nguya nyonso, ya Seko, ya bwanya ya bileko na bileko, na boye, ayebi mpenza malamuru te soki yo

okokóba koyika mpiko to soki okokóba te. Na nsima, ntango abikisi yo, mpe alobi: “Ee, Nakopesa ye mommekano, mpo kotala soki nini akosala,” na ntango wana Ayebi nsuka uta na ebandeli te. Nzambe ayebi oyo Ye azosala, bómitungisa ata moke te mpo na wana. Yo ná ngai nde tozali kobeta mabaku. Nzambe ayebi oyo Azali kosala. Mpe Ayebaki ete biso. . . soko tokokóba koyika mpiko, to nini tokosala.

²⁹⁷ Sikawa, Biblia elobi ete Esau ná Yakobo, liboso moko na bana yango ábotama, Nzambe alobaki: “Ngai nalingi moko, mpe nayini oyo mosusu,” liboso kutu bápema mpema na bango ya liboso, mpo kopona na Ye étikala solo.

²⁹⁸ Abraham azalaki nani (Tokolobela ye na mwa minuti, awa.), azalaki nani, mpo Nzambe ásengela kobenga, kobikisa ye kozanga ásala likambo moko? Nzambe asalaka kondimana ná moto, moto abukaka kondimana na ye. Kasi Nzambe asalaki Kondimana yango ná Ye moko, mpe akataki ndai na yango, na Ye moko, moto azali na eloko ya kosala kati na yango te. Ezali boyebi-makambo-liboso ya Nzambe Ye moko, nde Asalaki yango, ata bongo.

²⁹⁹ Sikawa, okoloba: “Ee, Ndeko Branham, boye soki nakómi Moklisto, nakoki na ngai kosala eloko nyonso nalingi?” Na ntembe te. Soki ozali Moklisto, sala eloko nyonso olingi. Mpe nakoyebisa yo, okozala na mposa moko te ya kosala mabe. Sala nyonso olingi. Ngai nasalaka ntango nyonso oyo nalingaki. Mpe soki nasalelaka Nkolo mpo nazobanga kokende na lifelo, nazali kosalela Ye malamú te. Soki nazali kobika sembo epai na mwasi na ngai mpo nazobanga ete áboma libala, nazali mobali malamú mpenza te. Kasi nakolinga koyokisa ye mpasi ata na likambo moko te, mpamba te nalingi ye.

³⁰⁰ Ezali mpe bongo ná Klisto, ntango moto abotami na Molimo na Nzambe. Ezali te mpo agangaki, alobaki minoko na sika, to ayokaki mwa nzoto; kasi na motema na ye, bolingo ekoti mpe ezwi esika ya mokili. Nayebisi yo, alingi Ye. Atambolaka na mopanzi na Ye, mokolo na mokolo. Ozali na ntina te ya koyebisa ye: “Ezali mabe kosala oyo, to wana to oyo mosusu.” Ayebi ete ezali mabe. Mpe, atambolaka, azali mbuma oyo ebongisámá ya ngolu ya bosomi ya Nzambe. Ezali mpenza bongo.

*Zambi ekokoka te mpo na baoyo basilaki
kongengelama, . . . basangani na . . . ebiangeli ya
likoló . . .*

Sikawa, tondimaki mbala mosusu ete ezalaki moto oyo asilaki kongengelama mpe oyo akweaki lisusu, kasi Biblia elobi yango ndenge wana te. “Ekoki mpenza kosalema te ete moto,” alobi awa, “oyo asili kozwa Molimo Mosanto, átikala kokwea.” Sikawa bótanga yango mpe bótala soki ezali bongo te. Bótala awa, bózwa eteni, eteni yango mobimba, mpe makambo, ndimbola na yango, nalingaki koloba.

301 Sikawa abandi kolobela yango, ezali nini? “Tókende kino na bobongi be.” Sikawa, alobaki: “Ya mosuni te, kotiáka mobóko ya malakisi, ya libatishi, ya mibeko, mpe bongo na bongo. Tósala bongo te. Tókende nde na bobongi be.” Likambo ezali nde *bobongi be*, mpe bobongi be eyaka na nzela na Klisto. Mpe tokoti kati na Klisto ndenge nini? Na kokotáká na lingomba? “Na nzela na Molimo moko, biso nyonso tobatisami na Nzoto moko.” Ezali te: na koloba monoko na sika moko; na mbote ya loboko moko; na libatishi ya mai moko. “Kasi na Molimo moko, tobatisami kati na Nzoto moko.” Bososoli yango? Yango nde bobongi be.

302 Mpe ntango okoti na kati na Yango, okómi kati na Klisto, mpe mokili ekufi mpo na yo. Mpe okómi kotambola elongo na Mwana-mpate mokolo na mokolo, mpe matambe na yo, oyo ozali kobwaka, ekambami na Nzambe. Oh, mimekano mpe komekama oyo tolekaka kati na yango! Okoloba: “Ozalaka na mimekano?” Iyo, misie. Ezali. . .

303 Ngolu ezali oyo Nzambe asalaki mpo na ngai, misala ezali oyo ngai nasalaka mpo na Nzambe. Sikawa, bakosala malakisi uta na yango, bakanisaka ete misala nde epesaka yo makoki. Soki ezali bongo, ezali likabo ya mpamba te. Ngolu ezali oyo Nzambe asalaki mpo na yo: “Na ngolu nde obikisami.” Mpe misala ezali oyo yo osalaka na botóndi na ntina na ngolu oyo Atalisi epai na yo. Mpe soki olingi Ye, okolinga kosala misala ya Nkolo. Na ntembe te, mpamba te, na ntango yango, o—olingi Ye.

304 Kondima Meda Broy, lokola mwasi na ngai, ezalaki oyo bolingo esalaki mpo na ye. Oyo asalaka, na botóndi: azali mwasi malamumu, atikalaka na ndako, abatelaka bana, mpe abikaka bomoi malamumu mpe ya sembo. Ezali te mpo tobalaná te; tobalaná. Kasi asalaka bongo mpo na botóndi. Ata soki atamboli na engumba, mikolo nyonso, kokótáká na magazin ya biloko ya ntálo moke mpenza, mpe komata-kokita na ba-balabala, mpe atikalá kosukola basani te, to soko nini mosusu, tozali kaka babálani. Ya solo mpenza. Ntango nazuaki ndayi na ngai, ekataki likambo. Azali mwasi na ngai. Na ntango nyonso oyo bomoi ezali kati na biso, azali mwasi na ngai. Ezali ndai na ye. Kasi matondi oyo atalisaka mpo na yango ezali: atikalaka na ndako, abatelaka bana, mpe alukaka kozala mwasi ya solosolo.

305 Nakoki kobima mpe kokende mobembo ya ntango molai, kotambola-tambola na ekolo mobimba, mpe kotika ye pene ya kokufa na nzala, to soko nini, kotika bana kozanga eloko ya kolia; tozali kaka babálani. Ata soki abomi libala, nazali kaka mobalani, na ntango nyonso oyo bomoi ezali na nzoto na ngai. Nazwaki ndai yango: “Kino kufa ékabola biso.” Ezali solo. Tozali kaka babálani. Kasi, nde, nakomilongisa te ete nazali mobali. Ye mpe akomilongisa te ete azali mwasi. Boye soki tolingani, tokotikala elongo mpe tokomema mokumba, elongo.

306 Ndenge wana nde Nzambe ná Lingomba na Ye bazali. Ntango obotami kati na Bokonzi ya Nzambe, okozala na *matá* mpe *kitá* na yo, solo, kasi ozali kaka Moklisto, obotami kaka na Molimo ya Nzambe. Ntango mosusu Nzambe asengeli kolongola yo na mokili liboso na ntango.

...yango ekokoka te mpo na baoyo basilaki kongengelama, mpe baleti... likabo na likoló,...

...kokende kino kokwea, kozonga bango moko lisusu na mbongwana na motema;...

307 Sikawa, nayebi esika oyo bozali kokanisa, lingomba. Tika názwela bino kaka moko, ya mwa makasi koleka, mpo ba—bato ya ngámbo ya mobeko bátikala libanda. Tókende na Baebele, mokapo ya 10, mpo tótála yango naino kaka mwa moke.

308 Mokapo ya 10, molongo ya 26.

Zambi soko tokosalaka lisumu na nko nsima na... kozua boyebi na solo, mbeka mpo na lisumu ezali lisusu te,

Kasi etikali bobele kotalela...esambiseli ya nsomo mpe móto na nkanda, oyo ekobebisa motemeli.

Ye oyo atiolaki mobeko na Mose akufaki na kozanga mawa na nse ya batatoli mibale to misato:

Bokanisi nini koleka etumbu ya nsomo ndenge nini, atako esengami... atako ebongi,...anyati...oyo asili konyata na nse na makolo Mwana na Nzambe, mpe asili kotiola makila na kondimana oyo abulisami na yango, lokola eloko na mpamba ezangi bulee, mpe... asili kotiola misala ya ngolu?

309 Sikawa bokoloba: “Olobi nini mpo na yango, Ndeko Branham? Ezali ndenge nini?”

Sikawa, kotánga kaka, nakanisi: “Likomi elobi *yango* te.” Yango ezali kolobela Moklisto te. Ezali kolobela moto oyo ayoki Liloba kasi apesi Yango mokongo. Bomoni?

Mpo soko tokosalaka lisumu... (lisumu ezali nini? Kozanga kondima)... soko biso tozangi kondima na nko nsima na Nsango-malamu koteyamela biso, mbeka mpo na lisumu etikali lisusu te,

310 Lisumu ezali nini? Kozanga kondima. Bótánga Santu Yoane, mokapo ya 4. Yesu alobaki: “Ye oyo ajali kondima te asili kokweisama.” Lisumu ezali te kobenda makaya, komela masanga, kosala ekobo. Osalaka yango mpo ozali mozangi kondima. Oyo wana ezali bobele misala. Osalaka yango mpo ozali mozangi kondima. Kotika komela makaya, kotika komela masanga, mpe bongo na bongo ndenge wana, elakisi te ete ozali—ozali Moklisto. Ezali kaka misala ya mbongwana na yo. Kasi, okoki—okoki kosala moko to mosusu, kasi ozali kaka yango te.

311 Sikawa bótala.

. . . ye oyo akozanga kondima *na nko nsima na ye* . . .

312 Ezali te—ezali te: “Nsima na ye koyamba Klisto na motema na ye.” Biblia elobi bongo te. Elobaki: “Ye oyo . . .”

. . . *soko tokosalaka lisumu na nko*, kozanga kondima na nko, *nsima na . . . kozua boyebi ya solo*, . . .

Bososoli yango? Azalaki kolobela Moklisto te, ata moke te.

313 Mwasi moko ayaki epai na ngai, eleki ntango molai te, mpe alobaki: “Ndeko Branham, nazali Moklisto, kasi natukaki Molimo Mosanto.”

314 Nalobaki: “Ekoki kosalema te.” Moklisto akokaki kotuka Molimo Mosanto te. Okoki kosala yango te. Molimo ya Moklisto etatolaka Molimo ya Klisto. Bomoni? Mpe nyonso ya Nzambe, okobenga yango “ya Nzambe.”

315 Kasi soki ozali na makanisi ya mosuni, okotiola mpe okoseka Molimo Mosanto; Ata soki osambelaka ndenge nini, ozali kaka mosumuki, mpe ozali kotuka Molimo Mosanto. Ntango bamonaki Yesu kososola makanisi na bango, balobaki ete Azalaki “moto na soloka.”

316 Yesu alobaki: “Bozali na . . . Nakolimbisa bino mpo na yango, kasi ntango Molimo Mosanto akoya, soki olobi liloba moko mpo na kotelemela Yango, ekolimbisamela yo ata moke te.”

Mpamba te, balobaki: “Azali na molimo ya mbindo,” kobengáká Molimo na Nzambe “eloko ya mbindo.”

Moklisto akoki kosala bongo te. Moklisto akobenga ntango nyonso Molimo ya Nzambe “Boyengebene.” Bomoni? Moklisto akoki kotuka Molimo Mosanto te. Moto ya libanda nde atukaka.

317 Baoyo bazalaki ya kotelema wana bazalaki Baklisto te. Bazalaki bato ya losambo, bazalaki Bayuda ya orthodox, balakisi ya bonzambe, mpe bongo na bongo, mpe bazalaki kotiola Ye mpe misala na Ye, kobengáká misala na Nzambe ete: “ezalaki molimo ya mbindo nde azalaki kosala yango.”

318 Mpe bokanisi ete bato boni lelo bazali kotuka Molimo Mosanto, baoyo bazali na Doctorat ya Theologie, Doctorat ya Philosophie na nkombo na bango? Ba-Orthodox, ba-Katoliko, ba-Protestant minene boni, batambolaka na balabala mpe batiolaka misala ya Molimo Mosanto, bato ya mayele mingi, oyo batángá mingi mpenza? Ya solo. Kasi batiolaka Molimo Mosanto, na bongo nde, batukaka Yango.

Kasi Moklisto oyo abotami mbala na mibale akoki kosala bongo te. Akoloba: “Wana azali ndeko na ngai. Wana ezali Molimo ya Nzambe na bomoi.” Ezali solo. Moklisto akoki kotuka Molimo Mosanto te.

³¹⁹ Mosumuki nde atukaka Molimo Mosanto; mozangi kondima, *mosumuki*, “mozangi kondima.” Makambo ezali bobele mibale: to ozali mondimi, to mozangi kondima.

³²⁰ Sikawa, bótala awa, mpo na kosukisa likambo yango. Nazwaki emononeli moko oyo ezalaki ntango nyonso kotungisa ngai. Eleki mibu ebele, nazalaki kotala yango. Nalobaki: “Oh, soki moto asili kozua Molimo Mosanto, bongo azongi nsima, akobunga mpo na libela.” Nazalaki kokoka te kolongobanisa oyo mosusu ná oyo wana.

³²¹ Nalobaki: “Na bongo mpo na nini kasi Biblia elobi, ete: ‘Ye oyo akoyoka Maloba na Ngai mpe akondima Motindi na Ngai azali na Bomo ya Seko, ya Seko, mpe akosambisama te, kasi asili kolongwa na kufa mpe koingela na Bomo. Baoyo nyonso Tata apesi Ngai bakoya epai na Ngai, mpe moko te kati na bango akobunga, Nakosekwisa bango na mikolo ya nsuka. Moto te akoki kolongola bango na loboko na Ngai?’ Ndenge nini yango elongobani na oyo? Nazalaki mpenza kososola yango te. ‘Ekoki kosalema te mpo na baoyo basilaki kongengelama.’” Nakanisaki: “Eloko moko ezali kotambola malamumu te. Nazali mpenza kososola yango te.”

Mpe nakendeki na mwa liyangani moko ya ba-Pantekotiste, eleki mibu.

³²² Ata moto moko te atikali na losambo, nabanzi, na mpokwa oyo, oyo azali koyeba yango lisusu. Eleki mibu, likambo yango esalemaki kutu pene na ntango oyo tabernacle oyo etongamaki. Loba bobele, ekoki kozala Ndeko Graham, kuna na nsima, to moto mosusu. Nayebi te soki bozalaki awa na ebandeli, to te, bandeko. Nakanisi ete ezalaki Ndeko Mahoney. Iyo. Liboso ete nábala.

³²³ Likabo yango ezalaki kosala, nazalaki kobanga. Bayebisaki ngai ete ezalaki ya zabololo. Nayebaki te kino ete Mwanje na Nkolo áyebisa ngai.

³²⁴ Nakendeki na Mishawaka, mpe nafandaki na liyangani yango, natikálá koyóká koganga mpe kolela mpe kokumisa Nzambe ya ndenge wana te. Namilobelaki: “Ndeko, oyo ezali Lola.” Mpe, oh, ndenge bazalaki komata-kokita.

³²⁵ Basengelaki kosala yango na Nordi, na ntina na bokabwani. Bato moindo ná mindele bazalaki elongo. Ba-Assemblée ya ba-Pantekotiste ya Mokili mobimba ná ba-Assemblée ya ba-Pantekotiste ya Yesu Klisto basanganaki mpenza mpe bakómaki ba-Pantekotiste Unis. Kasi bazalaki mpenza kosala mayangani minene ya kolamuka, kuna na tabernacle ya Ndeko Rowe na Mishawaka. Mpe ngai, elenge mobali na mposa ya koyeba, nafandaki na kiti ya nsima, nazalaki kolandela nyonso wana. Namonáká naino makambo yango liboso te.

³²⁶ Mobali moko afandaki awa... Natikálá kolobela likambo oyo na miso ya bato te. Mobali moko afandaki na ngámbo

moko, mpe mobali moko na ngámbo mosusu, mpe moko azalaki koloba minoko na sika, mpe mosusu azalaki kolimbola yango. Mpe bazalaki kolobela makambo ndenge na ndenge oyo ezalaki kosalema. Na bongo *oyo* alobi minoko na sika, mpe oyo *kuna* alimboli. Namilobelaki: “Oh la la, ezali mpenza kitoko mingi!” Nakanisaki: “Oyo ezali mpenza nkembo! Basengeli kozala Banje oyo bakítí na lolenge ya bato.”

³²⁷ Ee, nazalaki kaka na dollar moko ná ba-centime ntuku sambo na mitano, mpo na kozonga ndako, mpe na—na—nakokaki kaka kotondisa essence na motuka na ngai. Nalalaki na elanga ya masangu na butu wana. Nazali na eteni na yango na kati ya buku moko, kasi mobimba na yango te, mpo nalingaki kozokisa mitema na bango te. Na bongo, na mpokwa wana, balobaki: “Batei nyonso boya na etumbelo.” Nazalaki na etumbelo. Na ntango wana nazalaki motei ya elenge koleka kuna.

³²⁸ Bongo, na ntongo oyo elandaki, basengaki ngai ete náya koteya. Nabombanaki. Boyebi, moto moindo yango alobaki: “Ye oyo.” Bozali koyeba lisusu lisolo na yango, ntango abimisaki ngai na mpwasa na esika nafandaki wana.

³²⁹ Na bongo, nsima na koteya mokolo wana, nazalaki kotambola zingazinga, namilobelaki: “Soki nakokaki kokutana na mibali mibale wana.” Bakambaki liyangani. Moko akotelema mpe kokóma mpembe na elongi; akoloba minoko na sika. Mpe mosusu akolimbola yango, mpe akoloba: “YANGO ELOBI NKOLO: ‘Moto *songolo-pakala* azali awa, nkombo na ye *songolo-pakala*, asengelaki kosala *boye* mpe *songolo-pakala*.’” Ndeko, ezalaki solo. Mpe oyo mosusu akotelema mpe koloba minoko na sika, mpe akolimbola.

³³⁰ Namilobelaki: “Oh, la la, oyo ezali mpenza kitoko mingi!” Boye, mokolo wana, nakanisaki, nabimaki mpo na kobondela. Namilobelaki: “Nkolo, sala yango lisusu mpo na ngai.” Nayebaki ndenge ya kobenga yango te, bimononeli.

³³¹ Nakendeki kobondela, mpe nabondelaki ete Nkolo ásungá ngai. Nakendeki kozunguluka ndako yango, mpe esalemaki ete nakutanaki na moko na bango. Sikawa, Nkolo apésá ngai nzela ya koyeba makambo. Napesaki ye mbote ya loboko. Nalobaki: “Mbote?”

Alobaki: “Losako? Nkombo na yo nani?”

Nalobaki: “Branham.”

“Oh,” alobaki, “yo nde elenge oyo ateyaki na ntongo ya lelo.”

Nalobaki: “Iyo, misie.”

³³² Wana nazalaki kosolola na ye, nasimbaki molimo na ye. Azalaki Moklisto ya solosolo, Moklisto ya peto mpenza, ndeko. Nalingi koloba, azalaki mondimi. Namilobelaki: “Oh, ezali kitoko mingi!”

333 Pene na ngonga moko nsima na yango, kuna, pene na motuka, nazalaki kotala motuka moko ya monene, bakomaki “Yesu Kaka” na nsima na yango, mpe mobali mosusu oyo atelemaki wana. Napusanaki kuna mpe nalobaki: “Mbote, misie?”

334 Alobaki: “Mbote?” Alobaki: “Yo nde Ndeko Branham, oyo ateyaki na ntongo ya lelo.”

335 Nalobaki: “Iyo, misie. Ezali ngai.” Nalobaki: “Yoka, nasepeli na likabo monene ya Nzambe oyo esalaka kati na bino bandeko mibali mibale.”

336 Alobaki: “Matondi, M. Branham.” Mpe nabandaki koyoka molimo na ye. Emononeli moko eyaki. Mpe soko nasilá kosolola na mokosi moko, oyo wana azalaki moko na bango. Mwasi na ye azalaki na suki ya moindo. Azalaki kobika na mwasi mosusu ya suki ya mosaka, abotaki na ye bana mibale. Azalaki Moklisto na eloko ata moko te.

337 Bongo nalobaki: “Namikotisi na likambo nini? Nakanisaki ete nazalaki na kati ya Banje, kasi sikawa nasengeli kozala na kati ya milimo mabe. Likambo moko euti kosalema. Tala Moklisto moko ya solosolo, azalaki awa; mpe Molimo moko oyo ezali kokita likoló na mobali *oyo*, ezalaki kokita likoló na mobali *oyo*.” Nalobaki: “Sikoyo nakomi na mobulu mpenza.” Nayebaki te eloko nini kosala. Nalelaki mpe nabondelaki, epai na Nkolo. Nayebaki te eloko nini kondima.

338 Etikalaki moke bámema ngai na . . . Mobali yango atunaki ngai soki nasilá kozwa Molimo Mosanto, mpe nalobaki: “Te, misie, ndenge bino bozali na Yango te.”

Alobaki: “Osila koloba minoko na sika?”

Nalobaki: “Te, misie.”

Alobaki: “Boye ozali na Yango te.”

339 Boye nalobaki: “Ntango mosusu olobi solo, ndeko na ngai. Ntango mosusu nazali na Yango te, mpamba te oyo bino bozali na yango, ngai nazali na yango te.” Mpe nsima na mwa ntango, nasepelaki ndenge nazalaki na yango te.

340 Na bongo nalandelaki yango, mpe namonaki ndenge ezalaki kosala.

341 Boye, mokolo moko, nazalaki kobondela awa, eleki ntango molai. Nakoyebisa bino mpo na nini, moto oyo nazalaki kobondela mpo na ye, ezalaki Roy Davis. Mpe nazalaki kobondela awa, mpo autaki kobenga ngai “mobobe,” mpe nazalaki kobondela ete Nzambe álimbisa ye mpo na yango. Mpe azalaki na masini ya zulunále moko kuna, akomaki zulunále moko. Mpe masini yango ezwaki móto mpe ezikaki na mobimba, mpokwa mibale to misato nsima na yango, wana bazalaki kotambwisa yango.

³⁴² Na boye nazalaki kuna, na kati ya libulu moko ya kala, na nsima ya Green's Mill. Nabimaki kuna. Mpe nazalaki kobondela, nazalaki kuna, mikolo mibale. Natiaki Biblia na ngai likoló ya mobimbi ya nzete moko ya kala, epai wapi, nauti kolakisa yango na Ndeko Wood, kala mingi te, nakitisaki Biblia na ngai. Nafandaki likoló ya mobimbi ya nzete yango na kati ya makolo na ngai. Mpe mopepe epepaki. Nakanisaki: "Naumeli mingi na kati ya libulu yango, nátánga naino mwa moke." Bongo nazwaki Biblia mpe nabandaki kotanga, mpe ezalaki na mokapo oyo. Ee, nabandaki kotánga, mpe nabandaki komituna na ntango yango. Bomoni?

Zambi ekokoka te mpo na baoyo basilaki kongengelama, . . . bakomi basangani na Molimo Mosanto,

. . . koleta liloba kitoko ya Nzambe, mpe . . . ya mokili mokoya,

Soko basili kopengwa, bámizongisa na nzela lisusu bango moko . . . na kobongola motema; komona ete bazali kobakisa Mwana na Nzambe na ekulusu lisusu na bango mpenza, mpe bajali kotiola ye.

³⁴³ Namilobelaki: "Likomi yango, yango wana." Kasi eloko moko etingamaki ngai. Bongo nabandaki kokanisa: "Awa nde esika oyo alobaki, awa, na ebandeli: 'Kozanga kotia moboko ekufa ya kobongola motema, na ebandeli. Kozanga kotia moboko ya kobongola motema,' mpe awa alobi: 'Komizongisa bango moko lisusu na kobongola motema. Kasi tókende kino na bobongi be, kotikáká makambo oyo na nsima.'" Bongo nabandaki kotanga. Na bongo natangaki molongo oyo elandi.

Mpamba te mabelé oyo ekomelaka mbula oyo ekonokaka likoló na yango, mpe makobimisa ndunda kosunga baoyo batimoli yango, makoziuka mapamboli na Nzambe:

Kasi oyo ezali kobimisa nzube mpe matiti mabe, makoki na eloko te mpe mabongi kolakelama mabe; nsuka na yango kozika móto.

³⁴⁴ Mpe ntango natangaki yango, Eloko moko eningisaki ngai. Mpe nakanisaki: "Nkolo, yango etali Roy Davis te. Mpo na nini Osali bongo?"

³⁴⁵ Nabandaki, nabalolaki lokasa mosusu. Esengelaki názongela Yango, lisusu: "Ekoki kosalema te ete baoyo basilaki kongengelama," kozongela Yango lisusu.

³⁴⁶ Bongo nakanisaki: "Nkolo, oyo ezali nini? Olingi koloba nini, Nkolo?"

³⁴⁷ Nabalukaki mpe nazongaki na kati ya libulu na ngai, mpo na kobondela na ntina na Yango. Mpe ntango nasalaki bongo, namonaki mokili moko ezali kozunguluka. Mpe ebongisamaki

mobimba, kitoko mpenza, mokili mobimba. Mpe namonaki moto moko alataki elamba ya pembe, kotamboláká, asimbaki kitunga na loboko. Azalaki kokóna mimboto, wana azalaki kokende. Akendeki kino na nsuka, esika mabelé egumbámá. Mpe ntango kaka akatisaki, mobali moko ayaki, alataki bilamba ya moindo mpenza, azalaki lokola moto ya mayele mabe, azalaki kotambola na ekéngé *boye*, kotaláká. Mpe azalaki na momboto moko. Mpe azalaki kobwaka eloko moko nsima na yango, wana azalaki kokende zingazinga ya mabelé; kotaláká moto nyonso mpe kobwakáká. Natelemaki mpe nazalaki kotala emononeli yango.

³⁴⁸ Nsima na ye kokende, mokili ezungulukaki, mpe na molona monene, mingi mpenza ekomélaki, mpe ezalaki blé. Mpe matiti mabe, matiti ya nzube mpe biloko mosusu ezalaki elongo na blé.

³⁴⁹ Bokauki moko eyaki. Mpe, oh, mwa ble wana ekitisaki mwa motó na yango, mpe ezalaki na mposa ya mai. Mwa lititi ya nzube yango ekitisaki motó na yango, mpe ezalaki na mposa ya mai. Bango nyonso bazalaki kobondela mpo mbula énoka. Mpe nsima na mwa ntango, lipata moko ya monene eyaki mpe esopaki mai na mabelé mobimba. Mpe mwa lititi ya nzube yango epumbwaki, ebandaki kogánga: “Nkembo na Nzambe! Aleluya! Nkolo ázwa lokumu!”

³⁵⁰ Mpe mwa blé yango, epumbwaki, ebandaki kogánga: “Nkembo na Nzambe! Nkolo ázwa lokumu!”

³⁵¹ Na nsima Likomi yango eyelaki ngai, oyo ezuami na Buku ya Matai, mokapo ya 5 mpe molongo ya 45. Bóyoka ndenge Yesu alobaki, na Matai 5:45. Bóyoka malamú sikawa wana tozali kotanga. Matai, mokapo ya 5 mpe molongo ya 45, ya 46; ya 44, mpo na kobanda.

Kasi nalobi na bino ete, Bolinga bayini na bino, bopambola baoyo balakelaka bino mabe, mpe bósala bolamu na baoyo bayinaka bino, mpe bobondélaka mpo na baoyo bazali kosalela bino mabe, mpe konyokola bino;

Mpo bino bokoka kozala . . . kobenga . . . bino bokoka kozala bana ya Tata na bino oyo azali na likoló: mpo ete akobimisa moi na ye likoló na . . . mabe mpe likoló . . . malamú, mpe akotindaka mbula likoló na basembwi mpe . . . bazangi sembo.

³⁵² Na bongo, bomoni, mbula moko oyo ekolisaka blé, ekolisaka mpe lititi ya nzube. Mpe, na yango, nasosolaki. Wana nde moyamboli na yo ya mosuni, oyo azali kati na lingomba. Kasi mbuma na ye . . . Akoki kogánga, kopumbwa, kobina, koloba minoko na sika; kasi mbuma na ye: azali lititi ya nzube. Mpe ezali na mosusu, oyo azali na Molimo yango moko. Molimo Mosanto akoki kokita likoló na bato ebele, mpe mokosi akoki kogánga, na nzela na Molimo Mosanto, kaka ndenge moko lokola lititi ya nzube ekoki kobika na mbula oyo etindami. Yango nde oyo Paulo

azali kolobela awa. Kasi ekoki kosalema te ete lititi ya nzube ékóma blé, to blé ékoma lititi nzube. Bososoli yango? [Losambo balobi: “Amen.”—Mok.]

Zambi ekokoka te mpo na baoyo basilaki na ntango moko kongengelama, mpe basili . . . basangani na likabo ya Molimo Mosanto,

Mpe . . . *baletaki liloba malamau na Nzambe, mpe* nguya na mokili mokoya,

. . . *kokwea, komizongisa bango moko lisusu . . .*

Bóyoka oyo alobaki.

. . . *zambi mbula . . . ekonokaka likoló* na mabelé, mpo na kosopela yango mai mpe kobongisa yango awa, mpe kobelemisa yango;

Kasi . . . oyo ezali nzube mpe matiti mabe mabongi na koboyama; . . .

Sikoyo, na *yango totika* mikonzi mpe mateyo na *Klisto, tókende . . . na bobongi be; totika naino kotia moboko na kobongwana na motema* mpe *misala na kufa . . . liboso* na Nzambe, mpe kondima, mpe bongo na bongo,

. . . *mpe malakisi ya mabátisi, . . . kotiela bato maboko, mpe* nyonso wana; . . .

³⁵³ Bomoni, mondimi ya mosuni, na mikolo wana, kaka ndenge ezali lelo, alingaka koloba: “Ee, nasambelaka. Nabongola motema. Na—nayaki, nayambolá. Nabatisamá.” Bomoni, batalelaka mibeko ya nzoto wana. Mpe esalaka nini? Ebotaka matiti ya nzube.

³⁵⁴ Bobongi be esalaka nini? Ezali nde blé. Blé ezali Liloba na Nzambe. Asalelaka yango lokola Liloba na Ye. Ezali Momboto na Ye. Ebotaka.

³⁵⁵ Etali nde momboto oyo elonami na motema na yo. Soki oyei na losambo kaka mpo ozali kobanga lifelo, soki okoti lingomba mpo olingi te—olingi te kokende na lifelo, ozali kaka lititi ya nzube. Soki o—soki okoti lingomba kaka mpo óyebana, ozali kaka lititi ya nzube. Soki osali makambo nyonso ya mimesano oyo esengeli kosalema, mpe yango nde nyonso oyo ozali na yango, ozali kaka lititi ya nzube.

³⁵⁶ Kasi, Moklisto ya solosolo akendeke mbangu kino na bobongi be kino mokili ekufi mpe okómi ekelamo ya sika kati na Klisto Yesu. Na bongo, ekoki kosalema te ete moto yango ákwea. Yango nde Biblia elobi! Bomoni ndenge ekokani na Makomi oyo etikal? Bomonii ndenge Etii yango mpenza wana na esika na yango?

³⁵⁷ Ndenge nini Ekoki koloba awa: “Moto oyo asili kobikisama akoki kobunga te” bongo koya awa koloba: “Kasi, soki

obungi, to otuki, ekoki kosalema te”? Ya solo, soki ozali motúki, ozali Moklisto te.

358 “Moto moko te alobaka, na nzela na Molimo ya Nzambe, alobaka ete Yesu alakelami mabe.” Santu Yoane 4. . . to Yoane ya Liboso 4. Moto moko te, oyo azali koloba na nzela na Molimo ya Klisto, akoloba ete Yesu “alakelami mabe.” Molimo nyonso, ya Nzambe, oyo ezali kati na Lingomba ya Baklisto, endimaka makambo nyonso oyo Nzambe alobi.

359 Totangi awa, mpe elobi: “Azokisamaki mpo na masumu na biso. Na mapipi na Ye nde tobikisami.”

360 Likanisi ya kala ya mosuni elobaka: “Ntango ya bikamwa esilá koleka. Ngai nde *Dr. Jones*.” Bomoni? “Lobiko na nzoto kouta na Nzambe ezalaka te. Losambo ya motema ezalaka te. Bozali kaka etonga moko ya bato bamemamaka. Bosimbamaka na petee. Bomoni, nde nyonso oyo yango ezali. Eloko ezali te. Bisó tozali ba-Presbiterien. Bisó tozali ba-Lutherien,” to soko nini yango. “Toyebi esika totelemi.”

361 Kasi Molimo ya Nzambe elobi nini? Yesu Klisto, ndenge moko awa! “Amen,” elobi Molimo ya Nzambe. Eyokanaka nokinoki ná Liloba. Iyo, misie. Ezali mpenza wana. Bomoni likambo oyo nalingi koloba sikawa?

362 “Mibeko ya nzoto oyo eyeisaka kufa,” elobaki Paulo.

363 Kasi esika Bomoi ekómi, bobongi be oyo: “Ye oyo akoyoka Maloba na Ngai, akondima Ye oyo atindi Ngai, azali na Bomoi ya seko, mpe akokweisama ata moke te, kasi asili kolongwa na kufa mpe koingela na Bomoi. Nakopesa ye Bomoi ya seko, kosekwisa ye na mikolo ya nsuka. Baoyo nyonso Tata asili kopesa Ngai bakoya epai na Ngai, mpe moko te na bango abungi.” Ekoki kosalema te.

364 Boye, tala oyo esalaka—oyo esalaka. Bato bakanisaka ete yango ekomisaka bato bálemba nzoto. Ndeko, basalelaka Nzambe lokola moto azali kobanga nyoka te. Nzambe azali moko na mibali wana te, oyo bazali na fimbo lokola nyoka ya moindo, kotindikáká bino bipai nyonso. Azali Tata. Azali Bolingo. Nzambe azali Bolingo. Mpe, na Santu Yoane, Biblia elobi: “Ye oyo alingaka azali ya Nzambe.”

365 Olingi Nzambe. Nakozala na bolingo te, soki nabimi mpe—mpe nalángwe na mpokwa oyo. Naticálá komela masanga te, na bomoi na ngai. Kasi soki nabimi mpe nalángwe, nakobanga te kobetama fimbo. Yango te nde ntina nakendeke—nakendeke kosala yango te. Ntina oyo nasalaka yango te, ezali mpo nalingi Ye. Alingi ngai. Ezali misala ya mobeko te. Ezali eloko oyo nasengeli kosala te. Ezali mpo ete Asilá kosala eloko moko mpo na ngai, mpe ngai nalingi Ye mpo na yango. Yango mpenza.

366 Boye, ná Molimo wana na kati, oyo elakamaki: “Nakopesa ye Bomoi ya seko, mpe bakokufa soko moke te.” Akosaki to Alobaki

Solo? Alobaki Solo. Boye, bomoni ndenge Oyo elimbolaka? Ekoki kosalema te ete moto akwea soki asili kokóta kati na ngolu. Akoki te. Akoki kokwea, ya solo, kasi ya kozonga na kobongola motema te, kozonga na esika yango te, mpe kosala lisusu misala ya kala.

³⁶⁷ Na bongo bino nyonso oyo bokendeke mbangu longwa na mayangani moko ya kolamuka kino na mosusu, na esika moko kino na mosusu, bomonaka te ete botelemi ngwi te, bofandi ngwi te? Sikoyo, na ntembe te, okoloba: “Ndeko Branham, nayebi te soki . . .” na ntembe te Nzambe alingaki kopesa ngai lotómo oyo Apésá ngai te, bongo Átika ngai názala na libunga. Mpe soki etalisamaki polele na Makomi te, boye elingaki kozala libunga, kasi Makomi yango *oyo* mpo na kondimisa yango. Lingomba ezángá esika ata moke te.

³⁶⁸ Bato bakendeke kokóta na mangomba, koswana, kobunda, kotomboka, mpe—mpe nyonso wana, mpe kobika bomoi ya nzoto ya ndenge na ndenge, “Oh, iyo, nazali Moklisto.”

³⁶⁹ Nayokaki eyambweli moko lelo, ya mama moke moko oyo ayebisaki ngai ete mobali na ye abimaka na mobali moko. Akangá bango, na bisika ndenge na ndenge. Mpe mwasi yango alobi: “Yoka náyebisa yo: ‘Ngai nazali Moklisto.’” Um-hum.

³⁷⁰ Bótala awa, Jimmy Osborne, awa, ntango ateyaka mokolo ya Lomingo na ntongo; kasi kobeta boogie-woogie, rock-and-rolled mpe nyonso wana, mposo mobimba.

³⁷¹ Bótala Elvis Presley, lolenge ya Yuda Mokeliota ya mobu 1947, akoti epai ya ba-Assemblée de Dieu, Pantecotist, kolobáká minoko na sika ete ozali na Molimo Mosanto, mpe atindi milimo mingi na monyoko, koleka bisika nyonso ya milángwa oyo ezalá na mibu ntuku mitano oyo eleki. Abebisi makanisi ya bana mike na mokili mobimba, na lolenge ete bilenge bana basi yango, bazalaki kolongola bilamba na bango ya kati mpe kobwaka yango na eyako, mpo ye átia mokoloto na ye na yango. Ezalaki mpenza bosoto na lolenge ete balingaki kotalisa ye na television te, banda na loketo tii na nse, ndenge aningisaka nzoto na ye. bongo koloba Molimo Mosanto, koloba minoko na sika, nde ndanga? Oh, ndeko, soki Molimo Mosanto ezalaki kuna, Ekokaki kosala ndenge wana te. Boyebi yango malamumu. Ata moke te. Nzambe alingaka bosukwami, bopeto mpe bosantu.

³⁷² Namisalaka te lokola nasukwami, napetolami mpe nazali mosantu mpo na komisala Moklisto. Kasi Klisto, kati na ngai nde, abikaka yango kati na ngai. Mpe nalingi Ye. Mpe soki nasali eloko moko ya mabe, ekokweisa ngai. Mbala moko wana nakoloba: “Nzambe, limbisa ngai.” Mikolo nyonso, nasengeli kosenga bolimbisi, mikolo nyonso. Bino mpe bosalaka bongo. Na ntembe te, bosalaka bongo.

³⁷³ Kasi sikawa soki ozali—soki ozali moto ya mosuni, okozelisa yango, koloba: “Ah, ee, ezali mabe te, nazali moto ya lingomba.”

Bomoni? Na bongo, ntango otuki, ezali ntango ozangi Kondima oyo epesamaki na babulami mbala moko mpo na libela. Na bongo, otioli Yango, mpe obengi Yango “molimo mabe.” Okoloba: “Oyo wana ezali etonga ya batúntuki.” Na bongo omikaboli kati na ngolu mpe kosambisama, na bongo esili mpo na yo mpo na libela.

³⁷⁴ Yesu alobaki: “Liloba moko kotémela Yango, ekolimbisama ata moke te na mokili oyo to na mokili ekoya.” Mpe Moklisto, oyo abótámi na Molimo, akoki koloba mabe mpo na Yango te, mpo ekoki kosalema te. Azali na boyokani na Yango. Ya solo.

³⁷⁵ Yango nde ntina oyo bato balukaka koyebisa ngai ete Likonzi na Móto oyo kuna, oyo emonanaka awa elongo ná biso, balukaka koloba, ete: “Wana ezalaki zabolo,” ete: “Ezalaki kaka lisapo,” nyonso oyo. Kasi camera etalisaki polele ete Ezalaki bongo te. Mpe misala elongobani mpenza na Biblia, Likonzi na Móto yango moko oyo ekutanaki na Paulo na nzela ya Damaseke. Makambo nyonso oyo Ye asalaki kuna, azali kosala yango mpenza ndenge moko, na nzela ya Biblia. Ezali Klisto, Mwana na Nzambe.

³⁷⁶ Mpe ntango tobótami mbala ya mibale, tozali na Bomozi ya seko, mpe tokoki kokufa te. Ekokoka kosalema te ete moto ákwea. Yango nde oyo Biblia elobi.

³⁷⁷ Sikawa, bóyoka, botala malamumu oyo Paulo alobi. Nakotanga oyo etikali, mpo na koyeba soki ezali koyokana malamumu te, sikawa. Tókende liboso, mwa moke. Molongo ya 8.

Kasi oyo ezali kobimisa nzube mpe matiti mpamba, ekoki na eloko te, mpe ebongi na kolakelama mabe; nsuka na yango ejali kozikisama moto. (Wana nde mozangi kondima.)

³⁷⁸ Sikawa bótala Paulo. “Kasi, balingami, . . .” Sikawa azali kolobela baoyo balukaka kozonga na mobeko, boyebi, kolukáká kosala misala nyonso ya mobeko, ata bongo balingi milúlú mingi mpenza. Bazali na mabátisi mpe kotiela maboko, mpe makambo nyonso wana.

Kasi, balingami, tondimisami na makambo malamumu mpo na bino, . . .

Yango mpenza. Bóyoka ye sikawa.

. . . mpe biloko oyo ezali kotambola elongo na lobiko, atako—atako na nzela na oyo tozali bongo koloba.

Mpo ete Nzambe azangi boyengebene te ete abosana misala na bino mpe misala makasi ya bolingo, oyo botalisaki mpo na nkombo na ye, na motindo ete bino bosalelaki mpe bozali kosalela babulami.

³⁷⁹ Bomoni oyo azali kolobela? Azali kolobela te Baklisto oyo bakokaki kokweya, kozanga makoki ya kozonga. Azali nde kolobela bandimi ya mosuni, oyo balekaka na lolenge ya mibeko.

“Kasi,” alobaki, “mpo na bino baoyo bobotami mbala ya mibale, bino baoyo bozali Baklisto, balingami, tondimisami na makambo ya malamumu koleka mpo na bino. Bolobaka makambo wana te. Bobikaka bomoi ya lolenge wana te. Bobatelami elongo ná Klisto.”

Alobaki nini awa? Sikawa, tókende na Baebele 10, lisusu, esika tozalaki na ntongo ya lelo. [Maloba mazangi na eteni oyo ya bande—Mok.]

³⁸⁰ Sikawa, tófungola yango lisusu, na Baefese 4:30. Mpe tózua yango, bobele miniti moko, mpe tótala malamumu oyo yango elobi, mpo na kokembisa yango, kosala ete Likomi étambola elongo ná Likomi. Baefese 4, tótala. Baefese 4:30. Tótánga mpo tómona oyo Yango elobi. Bóyoka.

. . . koyokisa Molimo mosanto ya Nzambe mawa te, . . .

To—tobatisamaka ndenge nini kati na nzoto? Na Molimo moko.

*. . . Bóyokisa Molimo Mosanto ya Nzambe mawa te,
Bino botiami elembo kati na ye kino na Mokolo ya lisiko
na bino.*

Ezali solo? Botiami elembo kati na Nzoto ya Klisto, na nzela na libatisi ya Molimo Mosanto, uta na mayangani moko ya kolamuka kino na mosusu te, kasi kino na Mokolo ya lisiko ya Nzóto. Yango nde oyo bino bozali. boye nzela ezali te mpo na bino kobunga.

³⁸¹ Bóbangaka. Mpe yango nde ntina oyo kobanga, kobanga, nsomo etambolaka elongo ná ntembe.

Bolingo etambolaka elongo na kondima. Nalingi Tata na ngai. Nabangaka Ye te, mpo nalingi Ye. Akolinga kosala ngai mabe te. Akosalela ngai bolamu. Soki nazalaki kobanga Ye, mpe: “Oh, nayebi te soki Akosala yango, to te.” Bomoni?

³⁸² Kasi soki nalingi Ye: “Iyo, Tata, na—nalingi Yo. Mpe nayebi ete Ozali—Ozali Tata na ngai, mpe Olingi ngai, mpe nabangaka te kasi Okotosa Liloba na Yo. Ezali elaka na Yo epai na ngai.” Ndenge wana nde Molimo na Nzambe esalaka.

³⁸³ “Kasi, oh, soki nasalaki oyo, soki nasalaki oyo *wana*.” Bomoni, wana, bokómi lisusu na ngambo ya mobeko. Bókendeke na ngámbo ya mobeko te. Ezali ngámbo ya mabe.

³⁸⁴ Ngámbo ya malamumu, yango nde oyo bolingaka. Ezali mosala oyo esili kosalema. Klisto akufaki, mpe lisumu ebomamaki ntango Akufaki. Mpe soki Nzambe abongisaki yo liboso mpo na Bomoi na Seko: “Baoyo nyonso Tata asili kopesa Ngai, bakoya epai na Ngai.” Yango mpenza, bokoki kobunga te. Bobatelami mpo na libela. “Mpamba te na Molimo moko, biso nyonso tobatisami na Nzoto moko, mpe na mbeka moko, Abongisi biso be mpo na libela.” Yango mpenza. Ekoki kosalema te

ete tóbunga. Solo mpenza. Sikawa, ezali kosala ete bomiyoka malamumu, boye te?

³⁸⁵ Sikawa, bayebaka ndenge nini ete ozali Moklisto? Ntango molimo na yo ezali kotatola Molimo na Ye, ntango bolingo na Nzambe ezali kati na motema na yo, ntango ozali na bolingo, esengo, kimia, kokanga motema, boboto, motema molai, bolamu, bopolo. Na ntango yango nde yo... Mbuma ya Molimo ezali kolanda bomoi na yo.

³⁸⁶ Ezali te mpo okoki kobina na Molimo, oh, na mizíki ya mikolo oyo, oyo babetaka na piano, mpo na kobinisa bato na Molimo. Makambo yango ezali mabe te. Kasi bamemi mobimba na yango na ngámbo oyo ya mibeko, bomoni, mpe na bongo, batiki Molimo ya Nzambe na nsima.

³⁸⁷ Yango nde ntina oyo, ntango Nzambe abandaki komitalisa, balobaki: “Bolémá. Tolingi eloko moko te ya kosala ná Yango.” Bayebi Nzambe te. Batikáká komóná Yango te. Bakoki kososola Yango te, mpo bomoi ya ndenge mosusu nde ezali kuna na kati. Ayebi te, lititi ya nzube ayebi te oyo blé azali kosala. Azali na bomoi oyo ekeseni.

³⁸⁸ Ezalaka nde bongo ná Moklisto, liboso na mondimi ya nzoto, ya maloba, oyo akendeke koloba: “Oh, iyo, nazali Moklisto.” Cigar monene na monoko, lokola ngombe ya Texas oyo balongólá maseké.

³⁸⁹ Mwasi oyo alati kupe, akoloba: “Oh, iyo, nazali mondimi ya lingomba. Ya solo mpenza.” Mbuma na yo ezali kotalisa ete ozali bobele moto ya nzoto. Ya solo. Ya solo mpenza, ezali bongo. Eloko bobele moko ekoki kosala yango: to motó ezali kosala malamumu te, to molimo ya mposa ya nzoto ezali likoló na yo. Ya solo.

³⁹⁰ Soki olingi kosala lokola mokili, Biblia elobi: “Soki olingi mokili to makambo ya mokili, bolingo ya Nzambe ezali ata kati na yo te.” Boye yango mpenza.

³⁹¹ Sikawa, okoloba: “Oh, Biblia elobi bongo, boye nasengeli kosala yango.” Te, ezali bongo te. Tikala wana kino ntango Klisto akosala eloko moko mpo na yo, yango nde ekolongola yango kati na yo. Na bongo obotami na Molimo ya Nzambe. Oyo yo osalaka te, ezali oyo Ye asalá mpo na yo. Kino ntango okozua bolingo, ete osili kolonwa na kufa mpe koingela na Bomoi. Na nsima tala bomoi na yo malamumu, soki—soki ekolongobana. Ezali te mpo omekaka kobongisa bomoi na yo, kasi mpo Nzambe amemi yo na kotosa Molimo na Ye. Yo moko nde ozali komikamba na nzela ya Nzambe te. Nzambe nde azali kokamba yo na nzela na Ye mpenza. Yo te nde ozali kokamba, kasi Nzambe nde azali kokamba.

³⁹² Sikawa bótala likambo oyo malamumu, sikawa, wana tobandi kokende na kosilisa. Molongo ya 11.

Mpe tolingi ete moto na moto kati na bino atalisa boboto yango moko na kondimisama mobimba na elikia kino nsuka:

Ete bózala na bagoigói te, kasi balandi na baoyo na nzela ya kondima mpe na motema molai basangoli elaka.

393 Sikawa, likebisi mosusu moko awa.

Zambi wana epesaki Nzambe elaka epai na Abraham, mpo ete akokaki te kokata ndai na oyo aleki monene, akataki ndai na ye moko,

Kolobaka ete, Solo mpo na lipamboli nakopambola yo, mpe kofulisa, nakofulukisa yo.

394 Ntango Nzambe akutanaki na Abraham! Sikawa Abraham ayambaki kondimana, kozanga makoki nyonso. Kondimana yango esalemaki elongo na Abraham. Ezali mpenza ngolu, na mobimba nyonso. Abraham azalaki moto malamumu koleka te. Azalaki moto ya bosantu te. Azalaki bobele moto lokola bato nyonso. Mpe Nzambe, na nzela na kopona, aponaki Abraham mpo Nzambe aponaki ye; ezali te mpo Abraham alingaki yango, mpo Abraham asalaki *boye*, mpo azalaki moto malamumu, mpo azalaki na makoki moko boye. Kasi ezalaki kopona ya Nzambe. Nzambe azwaki Abraham.

395 Lelo, ndenge nalobaki, nandimi: “Toyonaka batei na biso.” Tokendeke, tolobaka: “Malamumu, moko na basungi alongwi. Tóluka moto ya malamumu koleka kati na ndako mpo ázua esika na ye. Ee, mobateli alongwi; tóluka, tózua oyo malamumu koleka.” Mbala mosusu ezalaka malamumu te.

396 Ntango baponaki moto moko mpo ázua esika ya Yuda Mokeliota, bazwaki moto oyo alongobanaki te. Bazuaki mobali moko malamumu, Matia, mokomeli monene, moto ya mayele mingi, moto ya makanisi malamumu. Balobaki: “Ye nde akozua esika yango mpenza. Tala, azali lokola mobali ya solosolo.” Kasi ezalaki boponi ya Nzambe te. Mpe azwaki moto oyo, mpe atikálá kosala eloko moko te mpo na Nzambe.

397 Kasi Nzambe aponaki mwa Moyuda moko, ya kanda-kanda, ya zolo egumbámá, oyo ayaki wana, ná elongi na ye: “Nakokende kuna. Nakokanga bango.”

398 Nzambe alobaki: “Namoni eloko moko kati na ye. Nakosalela ye.”

399 Mpe Nzambe amonanaki liboso na ye kati na Pole monene wana. Mpe alobaki: “Yo Nani, Nkolo?”

400 Alobaki: “Ngai nde Yesu. Ee, ezali mpasi mpo na yo kotuta makolo na yo na nzube. Mpo na nini ozali konyokola Ngai?” Ndenge wana, mpe Nzambe azuaki moto *yango* mpe akómisaki ye moko na bato ya monene koleka, oyo asilá koya na mokili, nsima na Yesu Klisto. Yango ezalaki kopona ya Nzambe.

⁴⁰¹ Lelo, tomekaka kopona. Bino mangomba, botindaka moto *oyo* awa, mpe moto *wana* kuna. Esengeli kosalema ndenge wana te. Nzambe nde akambaka. Ezali Nzambe kati na nyonso, na nzela na nyonso; ezali mokanda moko te, ya lingomba moko boye. Ezali oyo Nzambe alobaki na ntina na yango nde esalaka bokeseni.

⁴⁰² Bótala. Nzambe apesaki elaka na Abraham, na mobeko moko te. Mpe sikawa, bózela, Abraham azalaki na eloko moko te ya kosala. Nzambe alobaki: “Nasili kosala yango.”

⁴⁰³ Nzambe apesaki elaka na Adama, alobaki: “Adama, soki okosimba *oyo* te, okobika mpo na libela. Kasi mokolo okolia yango, mokolo yango okokufa.”

⁴⁰⁴ Adama alobaki: “Nazali komituna soki nyonso oyo elingi mpenza koloba nini, ata bongo?” Akei mpe alei yango, asimbi yango.

⁴⁰⁵ Ntango nyonso oyo Nzambe asalaka...oyo moto asalaka kondimana na ye elongo na Nzambe, to Nzambe elongo na moto, moto abukaka eteni oyo ya ye. Boye Nzambe asengelaki kosala eloko moko, mpo Amonaki oyo moto azalaki. Mpe babongisamaki liboso, baponamaki, mpe Nzambe asengelaki kosala eloko moko. Boye Nzambe akitaki mpe asalaki kondimana na Ye elongo na Abraham, na kozanga mobeko. Soki ézalaka ya kozanga mobeko te, mbele Abraham alingaki kobunga, bandá kala.

⁴⁰⁶ Bótala ye ndenge afandaki kuna na Gelala, mozongi nsima, kobukáká lokuta. Mpe akabaki mwasi na ye na mobali mosusu, mpo ámbikisa. Oyo mobali ya ndenge nini! Afandaki kuna, mozongi nsima. Nzambe ayebisaki ye, alobaki: “Komeka kolongwa awa te. Tikala wana.” Nzala ekimisaki ye. Awayaki-wayaki kino na esika oyo makambo ezalaki mwa petee. Boyebi eloko oyo ekomelaka moto soki alandi nzela ya petee.

⁴⁰⁷ Awayak-wayaki kuna, epai oyo matiti ezalaki mobesu koleka. Mpe ntango akómaki kuna, ayebisaki mokonzi wana ete mwasi na ye azalaki ndeko na ye ya mwasi, mpo ámbikisa. Sikoyo, oyo wana ezalaki lokuta. Mpe mobali nyonso oyo akozwa mwasi na ye mpe akokaba ye na mobali mosusu, mpo ámbikisa! Azalaki kuna, afandaki kuna na mwa hema, mozongi nsima, abukaki lokuta, mpe abimaki mpenza libanda na...alongwaki mpenza na elaka mpe nyonso wana, kasi azalaki kaka mosakoli ya Nzambe.

⁴⁰⁸ Mpe Abimeleke azalaki kuna, azalaki moto malamau, ya bosantu. Ya solo mpenza, azalaki kobondela mpokwa nyonso. Akutanaki na mama nkoko oyo, ya mibu mokama, oyo ayaki kuna, azongaki elenge mpe kitoko. Alobaki, “Oyo wana nde elenge mwasi oyo nazalaki kozela, boye nakobala ye.”

⁴⁰⁹ Abraham alobaki: “Okoki kozua ye. Azali ndeko na ngai ya mwasi.”

Ye mwasi: “Azali ndeko na ngai ya mobali.”

410 Boye amemaki ye kuna mpe atindaki basi wana básukola ye nzoto mobimba mpe—mpe bálatisa ye bilamba ya kitoko, mpe bábongisa ye lokola—lokola mwana-mwasi ya mokonzi. Mpe abondelaki, amisembolaki na mbeto, asembolaki makolo na ye, mpe alobaki: “Lobi, nakobala elenge mwasi kitoko wana, ya Baebele, ndeko mwasi ya—ya elenge mobali wana. Oh, ekozala kitoko mingi. E Nkolo, Oyebi ndenge nalingaka Yo! Iyo, misie. Kitoko mingi!”

411 Mpe Nzambe alobaki: “Ozali mpenza mokufi ndenge ozali wana.” Uh-huh!

412 [Ndeko Branham akosoli—Mok.] (Bolimbisa ngai.) Abra- . . . Ee, Abraham afandaki kuna, ákobuka lokuta, mozongi nsima. Mpe tala mobali yango, moto na bosembo, moyengebene mpe alimá. “Boye,” alobaki, “Nkolo, Oyebi bosembo ya motema na ngai. Ayebisaki ngai te ete azali ‘ndeko na ye ya mwasi?’”

413 Alobaki: “Nayebi bosembo ya motema na yo. Yango wana Nazobatela yo mpo ósala lisumu epai na Ngai te. Ya solo. Nayebi bosembo ya motema na yo. Kasi mobali na ye azali mosakoli na Ngai.” Aleluya! Oh, soki wana ezali ngolu te, ezali nini? “Mozongi nsima, azobuka lokuta, mpe afandi wana, kasi azali kaka mosakoli na Ngai. Zua likabo, mpe kende epai na ye, mpe zongisa mwasi na ye, soki te ozali mokufi. Nakoyoka lisusu mabondeli na yo te. Tika ete ye ábondela mpo na yo.” Amen. Yango mpenza. “Wana azali mosakoli na Ngai.”

Sikoyo, okoloba: “Oh, nalingaki kosepela kozala Abraham.”

414 “Soki tokufi kati na Klisto, tozali Momboto na Abraham, mpe tozali basangoli ya libula kokokana na elaka.” Ya solo. Yango nde oyo Biblia elobi. Bokolinga kotánga Yango? Ee, Biblia elobi ete—ete elaka yango ezalaki bobele mpo na Abraham mpe mimbóto na ye te. Lokola bino. . . Abraham azalaki na mimboto ebele, ya solo, bana mingi. Yismaele azalaki mwana na ye. Azalaki na bana nsambo to mwambe nsima na Sara kokufa, na nzela na mwasi mosusu, Ketura. Kasi bótala, momboto yango ezalaki oyo elakamaki, elingi koloba Yisaka, mpe na nzela na Yisaka, Klisto ayaki, na nzela na Klisto biso toyaki. Elaka yango ezali na mobeko te.

415 Sikawa, bongo mpo na Abraham? Malamu, akokaki kosala, ekokaki lisusu kosalema te ete átikala kozonga lisusu. Ya solo. Elingaki kosalema te ete Saulo átikala kozonga lisusu, soki bongo, bosengelaki kotanga Makomi ndenge wana. Bomoni? Kasi ezalaki bongo te. Elaka ya Nzambe eumelaka libela.

416 Tótánga awa mwa moke. Nalingi ete bótanga Yango. Nalingi ete bozwa Bagalatia 3:16, mpe bótanga yango, mpo bómona sikawa oyo elaka ezali, mpe tómona soki—soki tozali elaka na Ye to te, 3:16. Bóyoka awa. Malamu. Nakotanga mpe molongo ya 15.

Bandeko, nazali koloba na lolenge ya bato; Atako ezali bobele kondimana ya bato, nzokande soko yango esili kodimisama, moto moko te akokaki kolongola, to kobakisa na yango.

Sasaiipi epai na Abraham mpe momboto na ye (Momboto, m-o-m-b-o-t-o.), na momboto epai na nani elaka epesamaki.

“Epai na Abraham mpe Momboto na ye.” Sikawa bótala malamu.

Alobaki te, Mpe na mimboto na yo (boiké), lokola na mingi; kasi lokola . . . moko, Mpe na momboto na yo, oyo ezali Klisto.

⁴¹⁷ Na bongo, Klisto azalaki Momboto ya Abraham. “Mpe esili biso kokufa kati na Klisto, mpe kobatisama kati na Nzoto na Ye, tozali momboto ya Abraham, mpe tozali basangoli ya libula ya elaka.” Na boye ezali ndenge nini, ekobanda ndenge nini ete okwea, soki Nzambe apesaki yo elaka? Ndenge nini okotikaláká kozonga nsima, kopengwa, mpe é sengela ete ókende na lifelo mpo na yango?

⁴¹⁸ Sikawa, bokoloba: “Na bongo, tokoki nde kozonga nsima te?” Ya solo mpenza. Mpe soki ozongi nsima, okozua lifuti na yango, komitungisa te. Abraham azuaki lifuti na yango, mpe bango nyonso batiakali bazuaki lifuti na yango, mpe okozua yango. Kokanisa te ete epesi yo nzela ya kosumuka. Epesi te. Okofuta mpo na makambo nyonso osalaka. Okobuka oyo okolona. Soki osali mwa lisumu moko ya moke, okobuka sani mobimba, etondá. Ezali solo. Kasi, ndeko, elingi koloba te ete obungi. Ezali mpenza solo. Abraham abukaki mpenza oyo asilaki kokóna. Ezali solo. Kasi abikisamaki ata bongo.

⁴¹⁹ Kondimana oyo Nzambe asalaki na Yisraele: babungisaki libula na bango, babungisaki mboka ya elaka mpe bakendeki kino na Ezipito, kasi babungisaki kondimana na bango te. Nzambe alobaki: “Nakanisi lisusu elaka na Ngai epai na Abraham. Nakanisi lisusu, mpe Nakiti mpo na kosikola libota na Ngai. Kende kuna, Mose, mpe yebisa Falo ete Ngai nalobi: ‘Tika libota na Ngai bákende.’ Nakanisi lisusu ete Napesaki elaka na Abraham mpe na momboto na ye.”

⁴²⁰ Ezali mpe ndenge moko ná biso. Boye soki osili kokufa, mpe bomoi na yo ebombami kati na Nzambe, na nzela na Klisto, eloko moko te na mokili oyo ekoki kosimba yo. Sikawa, okoki na yo kokende mpe kosala mabe, kasi soki ozali mpenza, na bosolo, mwana na Nzambe, mpe omoni ete osali libunga, okotelema mpe okomeka lisusu. Ezali solo, mpe okomitika wana te.

⁴²¹ Kasi soki ozali na goigói, soki ozali lititi ya nzube, soki “télema” ezali kati na yo te, okoloba: “Ah, boye, ezalaki na Yango solo te, ata bongo.”

422 Bokonzi na Nzambe ezali lokola moto oyo azwi monyámá, akei na mbu mpe abwaki monyama. Ntango ayei, azuaki bakóbá, magbololo, ba-nyoka, miseleketete, mampulututú, mpe mbisi. Wana nde Nsango-malamu ntango Eteyamaka.

423 Ndakisa, Nkolo akoyebisa motei moko, ndakisa Ndeko Graham ete: “Kende *kuna*. Kende na litumu *oyo* kolóbo mwa moke, Ndeko Graham.” Malamu, azui monyámá na ye, akei kuna mpe abandi kolóbo na monyama.

“Ozali kokende wapi, Ndeko Bill?”

“Nazali kokende na esika mosusu, kobwaka na litúmu *oyo*.”

424 Nazali kobenda: “Tala bango wana, Nkolo, Yo nde oyebi oyo bango bazali.” Nabendi lisusu monyama: “Malamu, bango oyo, Nkolo.”

425 Sikoyo kóba azalaki kóbá, mpo na kobanda. Okangamaki kaka na kati ya monyámá. Ya solo. Mpe ndenge wana nde bato bakangamaka na kati ya komiyoka nzoto: “Oh, aleluya! Aleluya! Nkembo na Nkolo! Nkembo na Nzambe! Aleluya!” Bakangamaki kaka na kati ya monyámá, esili.

426 Soki molimo ya kala wana ya kóbá ezali kati na bango, ekoumela te, bakoloba: “Malamu, nayebisi yo, . . .” Abandi konguluma mpo na kozonga.

427 Mpe mobange mama nsániá akoloba: “Kasi nazokoka na ngai mpenza kososola Yango te.” Bomoni?

428 Mama limpúlútútú’ akofanda wana mwa moke, akobanda kosala “plop, plop, plop,” mpo na kozonga, “Boye, eloko moko ezalaki na Yango te, ata bongo.”

429 Mademoiselle Nyoka akoloba: “Oh, bazali etónge ya batuntuki. Nde nyonso oyo ezali na Likambo Yango. Nakokende na esika oyo bato bazali na bomoto koleka bango.” Ee, ozali na yo nyoka, mpo na kobanda. Monyama ya Nsango-malamu ekangaki yo kaka, esili.

430 Kasi mbisi ekomemama na mesa ya Nkolo. Azalaki mbisi, mpo na kobanda. Momboto na ye ezalaki mbisi. Abandaki mbisi, mpe Nzambe ayebaki mbisi na Ye longwa na kozalisama ya mokili. Aleluya!

431 Bomikanisela, bango nyonso bazali kopema mai yango moko ya potopoto kuna. Bango nyonso bazali kopema mai ya libeke yango moko. Ya solo. “Biso nyonso tosalaki . . . tomelaki mai ya Libanga yango moko. Biso nyonso toliaki mána kati na lisobe.” Kalebe ná Yosua baliaki mana moko oyo—oyo baoyo nyonso batikali baliaki. Mpe bango nyonso bakweaki kati na lisobe. Kasi ezalaki na mibale oyo baponamaki mpo na kokende kuna, mpe bakendeki kuna. Ya solo.

432 “Biso nyonso tomelaki na Liziba yango moko.” Kasi baoyo nyonso bamelaka, bango nyonso te nde babikisamaka. Biso

nyonso togangaki elongo. Bisu nyonso tosepelaka elongo. Kasi Baponami nde babikisami. Bomonaki yango? Elobaki: “Milimo mibale yango, na ntango ya suka, ekozala mpenza pene na lolenge ete ekopengwisa ata Baponami, soko nde ekokoka,” soko nde ekokoka. Bomoni? Yango nde Molimo ya solosolo ya Nzambe, baponami mpo na Bomoi na Seko.

⁴³³ Sikoyo tolingi kosukisa. Na nsima Ndeko Neville akobanda na esika oyo ngai nakosuka awa. Malamu.

Mpe najali koloba boye, ete kondimana, oyo ekokisamaki liboso na Nzambe kati na Klisto, mobeko, oyo ezalaki mibu nkama minei, mibu nkama minei na ntuku misato nsima, ekoki te kolongola, ete esengeli kokomisa elaka mpamba.

Yango nde elaka oyo Nzambe apesaki Abraham, liboso ete mobeko yango ézala.

Zambi soko li—zambi soko libula eyei na mobeko, ezali lisusu ya elaka te: kasi Nzambe apesaki yango na Abraham na nzela na elaka.

Na nzela ya eloko moko te oyo yo osali, na nzela ya mibeko moko boye te, mibeko moko boye ya lingomba na bino, na kokotáká na lingomba, to na mobeko mosusu nini. Ezali mpenza mosala ya ngolu na Nzambe, epai na yo. Yango wana mpenza.

⁴³⁴ Bótala malamumu.

Mpo na yango mobeko ezali mpo na nini? Ebakisamaki na ntina na kobuka mobeko, kino momboto ekoya epai na baoyo elaka epesamaki; . . .

Ezali mpenza polele, lokola zolo na elongi na ngai, boye te? “Ebakisamaki, mpo na kosalela kino Momboto éya, elingi koloba Klisto, epai na Ye oyo elaka epesamaki.”

. . . mpe ebongisamaki na banje mpe na maboko ya molobeli moko.

Sasaipi, molobeli azali molobeli na moto moko te, kasi Nzambe azali bobele moko.

⁴³⁵ Sikawa, nasuki wana, Ndeko Neville akobanda wana, mpo na mokolo ya misato ekoya.

⁴³⁶ Sikawa bososoli oyo tolobi? [Losambo balobi: “Amen.”—Mok.] Ete ekoki kosalema ata moke te ete Moklisto oyo abotami mbala ya mibale, oyo. . . nalingi koloba te, sikawa, oyo *amibengaka* ete “abotama mbala ya mibale.” Nalingi koloba, Moklisto ya solosolo, oyo abotama mbala ya mibale, ákwea longwa na ngolu, akoki kosala yango te. Akoki kokwea, ya solo, kasi akoki te, ata moke te, kobima libanda na ngolu wana.

Abraham akweaki longwa na ngolu. Ya solo, akweaki. Nzambe ayebisaki ye ete “átikala wana.” Abimaki libanda na yango, kasi abungisaki kondimana na ye te. Azalaki kaka

moponami ya Nzambe. Azalaki mosakoli, ntango afandaki kuna. Azalaki ntango nyonso bongo. Akozala ntango nyonso ya Nzambe.

⁴³⁷ Sikawa bótala. Biblia elobi ete: “Yisraele mobimba bakobika.” Bato boni bayebi yango? Biblia elobi: “Yisraele mobimba bakobika.” Sikawa: “Yisraele ezali Yisraele oyo ya mosuni te, kasi Yisraele ya Molimo, mpamba te makabo mpe kobengama etali kobongola motema te.” Yango nde oyo Biblia elobi, kaka na molongo oyo elandi? Bagalatia. Malamu. “Yisraele mobimba bakobika. Bango nyonso babikisami.” Ndege nini tokómaka Yisraele? “Wana tokufi kati na Klisto, tokómi Momboto ya Abraham, mpe tokómi basangoli ya libula kokokana na elaka.”

⁴³⁸ Paul alobaki: “Oyo azali yango na libanda azali Moyuda te, kasi oyo azali yango na kati, azali Moyuda, Baoyo bazwi elaka.” Mpe tozali Momboto ya Abraham, na nzela na elaka, na nzela na Klisto, toyambi Ye lokola Mobikisi na biso mpenza.

⁴³⁹ Oh, nalikii ete bozali komona yango. Nalikii ete bozali kososola yango, soki bokoki kokangama na Yango mwa ntango. Sikawa awa tosilisi oyo, na nsima tokolobela Melekisedeke, oyo ekozongisa biso mbala moko na likambo oyo. Tokobanda mbala moko na . . . Oh, Ezali mpenza, likambo yango mobimba ezali kitoko mingi. Kasi tozali kaka kokóba kokóta na kati ya eteni ya elengi.

⁴⁴⁰ Sikawa, bomoni, soki bozwi Oyo *awa*, ezali lokola, soki okoki kotanga Yango lokola moto oyo azali kaka kotala-tala, lokola mondimi moko ya solosolo, ya Bosato bosantu, oyo andimaka ete Banzambe bazali misato, ayebisaki ngai mokolo moko, ete, “Matai 3 elobi polele ete bato bazali misato, Bato misato oyo bakeseni kati na Bonzambe.”

⁴⁴¹ Nalobaki: “Nasengeli komona yango.”

⁴⁴² Alobaki: “Bótala malamumu.” Atelemaki mpenza na eteyelo oyo, alobaki: “Tala awa, Matai 3,” alobaki: “Ntango Yesu abimaki na mai, tala, makoló efungwamaki mpo na Ye, mpe Amonaki Molimo ya Nzambe lokola ebenga. Mpe Mongongo kouta na Likoló elobaki: “Oyo nde Mwana na Ngai molingami, Nasepeli na Ye mingi.” Mpe bazalaki misato: Mwana na libóngo; Molimo Mosanto na katikati; mpe Tata kuna likoló.”

Nalobaki: “Ndeko, Likomi yango elobi *bongo* te.”

“Oh, iyo Elobi bongo!”

Nalobaki: “Sikawa tanga Yango lisusu, mpo ómona soki Elobi bongo.”

⁴⁴³ Sikawa, elili na ye yango oyo. Nzambe Ye *oyo*, Mwana; Nzambe Ye *wana*, Tata; *awa* nde Nzambe, Molimo Mosanto, lokola ebenga. Sikawa bótala malamumu. Biblia elobi ete ntango Yesu abatisamaki: “Mwana abimaki mbala moko na mai,

tala, lola likoló na Ye efungolamaki. Mpe Mongongo moko elobaki. . .” Amonaki Molimo ya Nzambe, Molimo ya Nzambe, lokola ebengá. Moto mosusu na likoló *kuna* te, kasi Molimo ya Nzambe ezalaki Ebengá oyo ezalaki likoló na Ye, mpe Mongongo moko eyaki koloba: “Oyo azali Mwana na Ngai na bolingo, Nasepeli kofanda kati na Ye.” Sikawa bótanga Matai 3 mpe bótala soki elobi bongo te. Bomoni? Bato misato te, ata moke te.

444 Mpe ndenge wana nde . . . Yango elobi te ete ekoki kosalema te ete moto áya lisusu, bongo, ntango azongi nsima. Elobi bongo te. Elobi bongo te. Elobi: “Ekoki kosalema te ete moto áya lisusu komiyeisa sika, nsima na ye kosila kozala kuna.” Akoki kosala yango te.

445 Biblia elobi: “Ye oyo abotami na Nzambe, asalaka lisumu te, mpo akoki kosala lisumu te. Mpamba te Momboto ya Nzambe efandi kati na ye, mpe akoki kosala lisumu te.” Ndenge nini nakoki kobengama mosumuki, na ntango oyo mbeka moko ezali wana mpo na kozua esika na ngai? Ndenge nini nakoki kokufa, na ntnago kufa esili kofutama mpo na ngai? Ndenge nini nakoki kokufa, ntango oyo nazali na Bomoi ya Seko? Nakokufa ndenge nini? Okoki kokufa te.

446 Ndenge nini nakoki kozala na ndingisa ya mokonzi ya engumba oyo, ya kokumba motuka na mbangu ya kilometre mokama na ngonga moko na engumba oyo, bongo polisi moko ákanga ngai mpo nakumbi motuka na mbangu ya kilometre mokama na ngonga moko? Ndenge nini okoki kosala yango? Nazali na ndingisa ya moyangeli ya engumba oyo elobi ete nakoki kosala yango. Akoki kokanga ngai te. Ko—kokanga na ye, akoki kobeta piololo mpe nyonso wana, mpe ngai nakoki koyokela ye te. Elakisi eloko moko te; nazali na ndingisa.

447 Bongo ndenge nini ngai, nsima na Klisto kokufela ngai mpe nakomi boyengebene na Ye, mpo na ngolu mpe bolingo na Ye epai na ngai? Ndenge nini nakoki kosala lisumu, wana eloko moko ezali katikati na ngai ná Nzambe, mbeka moko? Nakoki kosala lisumu te. Nakoki te. Nzambe amonaka ngai te; Amonaka Klisto. Atelemaka na esika na ngai. Mpe soki nasali eloko moko ya mabe, Klisto azwaka esika na ngai. Nayambolaki mabe na ngai: “Ngai nazali na libunga. Ye azali na elonga. Nkolo, Oyebi motema na ngai. Oyebi soki nakani yango to te. Mpe nazali na libunga. Limbisa ngai.” Nzambe amonaka yango ata moke te. Makila ya Yesu ezipaka ngai, ntango nyonso. Na bongo ndenge nini Nzambe akoki komona ngai? Ndenge nini lisumu ekoki ko—kotangamela ngai, na ntango oyo Akoki kosala yango te? Kaka ntango nasali yango, elimbisami. [Ndeko Branham alelisi misapi na ye—Mok.] Ya solo.

448 Ezali lokola kozwa mwa—mwa etangiseli lokola *oyo*, mwa etangiseli matangá na miso, mpe kotondisa yango na mai ya ekomeli ya moindo mpe otelemisi yango likoló ya sani monene

oyo etondi na nkisi ya kolongola mbindo, mpe otangisi yango na kati kuna, mpe na nsima koluka komona yango lisusu. Ekomi nkisi ya kolongola mbindo. Mai ya ekomeli yango ekómi nkisi. Mpe yango nde eloko ekomelaka masumu oyo oyamboli, soki ozali kati na Klisto. Katikati na yo ná Nzambe, sani monene etondi na nkisi ya kolongola mbindo ezali, mpe lisumu na yo ekómi boyengebene mpo Mbeka ya boyengebene ezali kozela yo kuna.

Wana nakokóma na ebale, na nsuka ya mokolo,
Mpe mipepe ya nsuka, ya bolózi, ekosila
kopepa;

Likanisi moko esepelisaka ngai mpe epesaka
esengo na motema na ngai,
Nakosengela kokatisa Yaladane ngai moko te.

449 Yango nde likambo moko ya malamú. Yango nde likambo moko ya malamú. Nakosengela kokatisa yango te. Moko na mikolo oyo, tokokóma na nsuka ya nzela. Mói ekoboya kongenga, bongo Nzambe akobenga.

450 Adama akosembola loboko mpo na kopesa Ewa mbote, mpe akoloba: “Cherie, yango oyo. Ntango ya kolamuka ekoki.”

451 Ewa akosembola loboko mpe akosimba Abele, akoloba: “Yaka awa, cheri. Ntango ya kolamuka ekoki.” Abele akosimba Sete. Mpe Sete akosimba Noa. Noa akosimba. . . Oh, bongo na bongo, bongo na bongo kino na Abraham, ndenge balandanaki. Ekozala na koningana mpe kolamuka monene, ntango Mwana na Nzambe akoya. Tokokóma lokola Ye na mokolo yango.

452 Sikawa, soki osali lisumu awa, okofuta mpo na yango. Nazali na . . .

453 Ezali kaka koyela ngai na makanisi, nasengelaki kaka kolobela yango. Nameki kokanga yango, mbala minei to mitano. Nasengeli koloba yango. Bato boni bayebi lisusu ndeko yango, mobateli, oyo azaláká awa na église de Dieu? Ndeko, na likoló awa, nkombo na ye ezalaki nani? Azalaki kosala na Vorgan kuna. Oh, bino nyonso. . . Eglise de Dieu ya Liboso, bobele awa na litúmu. To, azaláká koteka biloko ya Rawleigh na eleko ya—ya ngelele. Moto moko malamú mpe mosantu. Ndeko Smith azwaki esika na ye kuna. Nakotánga nkombo na ye nsima ya mwa minuti. Azalaki moto moko asilaki kobikisama na Nzambe.

454 Bomikanisela, soki ondimi kosembolama te, mpe yo Moklisto osali likambo moko ya mabe, Nzambe akekebisa yo. Na nsima soki otosi likebisi te, Akolongola yo na mabelé. Yango nde Asalaki.

455 Bozali komikanisela, na Biblia? Bótala lingomba ya Bakolinti wana. Ayebisaki bango oyo bango bazalaki, esika na bango, kati na Klisto. Kasi akebisaki bango na makambo oyo elingaki kosalema. Mpe bamisembolaki, babongisaki likambo na bango, ná Nzambe.

456 Mpe elenge ndeko yango, azalaki elenge ndeko moko ya malamau mingi, nandimaka ete azalaki moto moko oyo abikisamaki na Nzambe. Azwaki mosala moko awa na... na Vorgang. Soki ndeko na ye moko azali awa, nabanzi ete okokanisa te ete ngai... nayebi yo te soki ozali awa. Kasi, Ramsey, Ndeko Ramsey, bato boni bayebi lisusu Ndeko Ramsey oyo azalaki awa na Eglise de Dieu? Ya solo, boyebi ye, elenge mobali moko ya malamau mingi. Mpe azaláká koya na ndako na ngai mpe tozalaki kosolola, mpe tokofanda wana, kolela mpe kosimbana maboko; Moklisto ya solosolo.

457 Mokolo moko nakotaki kuna, nautaki na mikili ya bapaya, na mayangani, nakendeki kotalisa motuka na ngai, Ndeko Ramsey alobaki: “Nakoki kosala nini mpo yo, Billy?”

458 Nalobaki: “Tala yango, Ndeko Ramsey. Tia mafuta ya sika.”

459 “Malamu,” alobaki, “kitoko, malamau mpenza.” Alobaki: “Mayangani eleki malamau?”

460 Nalobaki: “Oh, Ndeko Ramsey, ezalaki kitoko mingi.” Nalobaki: “Nakosepela soki okokaki kokende elongo na ngai mokolo moko. Mpo na nini okendeke elongo na ngai te?”

Alobaki: “Nasalelaka lisusu Nkolo te, Billy.”

Natáláki nzinga-nzinga, nalobaki: “Olobi nini?”

461 Alobaki lokola: “Nasalelaka Ye lisusu te,” alongwaki wana.

462 Nakanisaki: “Oh, azali kaka kosala maseki.” Nalongwaki wana, nakendeki na esika moko boye.

463 Nazongaki mpe nakotaki na motuka na ngai. Nazongaki na ndako, mpe nabandaki kokanisa yango: “Nasalelaka lisusu Nkolo te.”

464 Nkolo atiaki na motema na ngai ete názonga kuna mpe nátuna ye lisusu. Boye, nalobaki: “Meda, batela ndako.”

465 Mpe nakotaki, nakotaki na motuka na ngai mpe nazongaki kuna, natelemaki lisusu, nakotaki na Vorgang. Nalobaki: “Ndeko Ramsey, nalingi kotuna yo motuna.”

Alobaki: “Malamu, Billy, motuna nini?”

Nalobaki: “Olobaki, eleki mwa ntango, ete osalelaka lisusu Nkolo te. Ozalaki bobele kotumola ngai, boye te?”

Alobaki: “Te.”

Nalobaki: “Ndeko Ramsey, o—olingi koloba bongo te.”

Alobaki: “Iyo.”

Nalobaki: “Olingi Ye, boye te?”

Alobaki: “Soki nálingaka Ye, nalingaki kosalela Ye, boye te, Billy?” alongwaki wana.

Nakanisaki. “Tala, Ndeko Ramsey!”

Alobaki: “Nalingi lisusu kolobela yango te.”

466 Nazongaki na ndako, nakotaki na chambre, nakangaki ekuke. Mpe, oh, boyebi ndenge bozitó oyo mpenza tokomiyoka, lokola ete obotoli mwana bisikiti to eloko moko, boyebi. Na—nakanisaki: “Nini? Ekoki kosalema te. Na ntembe te, likambo moko ekómeli Ndeko Ramsey.”

467 Mpe elenge mobali moko ya moindo, nkombo na ye Jimmy, ayaka na losambo awa. Lokolo na ye moko, boyebi; aténgumaka, tóloba. Nabosani nkombo na ye, asalaka kuna na Vorgang, atambusaka motuka ya kobongisa mituka. Akutanaki na ngai, mpe alobaki: “Oyebi, Rev. Branham,” alobaki, “nayebi te likambo oyo ekómeli Dr. Ramsey awa.” Alobaki: “Nayebisaki ye, mokolo wana, nalobaki: ‘Biso nyonso tozalaki kobanga ata kofungola monoko awa.’ Alobaki: ‘Ozalaki moto moko mosantu.’ Kasi,” alobaki: “Azwaki mokanda na ye ya motei, akendeki na fúlu mpe apasolaki yango na biteni, mpe abwakaki yango na kati ya fúlu, alobaki: ‘Nazali lisusu na ntina na yango te.’”

Alobaki: “Hé, misie!” Alobaki: “Osengeli kosala bongo te.”

Alobaki: “Oh, Jim, natiki kosalela Nkolo.”

Bongo akobaki, alobaki: “Olingi koloba bongo te.”

468 Mpe alobaki: “Bongo ayebisaki ngai, alobaki ete alingaki koya kosukola ba-soupape na ye, mokolo ya Eyenga ya Basali,” nabanzi. “Mpe alobaki: ‘Sikawa, nalingi ete óya kosunga ngai, Jim.’”

469 Alobaki: “Nakosunga yo ntango nakouta na losambo, kasi liboso, nakei na losambo.”

470 Alobaki azongaki kuna: “Mpe M. Ramsey azalaki kosukola ba-soupape na motuka na ye. Alobaki: ‘Jimmy, kende mbangu na ngámbo ya ebale. Awa bakangi bisika batekaka masanga. Kende mbangu na ngámbo ya ebale kosombela ngai kazié ya masanga.’”

471 Alobaki, “M. Ramsey, Nakweisámá na makambo mingi, kasi ata mbala moko te nakokweisama na kosombela mosali na Nzambe kazié ya masanga.” Alobaki: “Te, misie. Nakosala yango ata moke te.”

472 Mpe alobaki: “Boye, kende. Sombela ngai, Jim.”

473 Alobaki: “M. Ramsey, ngai nakosukola ba-soupape na yo. Kasi soki okomela masanga, okokende kosomba yango yo moko.” Alobaki: “Ngai nakosombela mosali na Nkolo eloko ya ndenge wana ata moke te.”

474 Na bongo Ramsey akotaki mbangu na motuka ya Jimmy, akendeki na ngambo ya ebale; azongaki, abandaki kolangwa, na kazié ya masanga, komeláká yango.

475 Abandaki kobeba, mpe azuaki bokono. Bomoni? Nzambe akokaki koloba na ye te. Nakebisaki ye, nasalaki nyonso oyo nakokaki kosala. Ndeko Smith akendeki epai na ye mpe

akebisaki ye. Bato nyonso bamekaki kosala nyonso oyo bakokaki mpo na ye. Ata bongo, aboyaki kaka. Likambo nini esalemaki? Azuaki bokono mpe akufaki. Yango elakisaki ete azalaki moto oyo abikisamaki. Soki Nzambe akokaki kosala ye. . . komema ye na botosi te, Akosengela kolongola ye na mabelé mpe kozongisa ye na Ndako. Yango mpenza nde Biblia elobi. Yango nde oyo Biblia elaki. Soki oboyi koyoka kosembolama, osengeli kozonga na Ndako.

⁴⁷⁶ Boye, Nzambe akoki kobungisa yo te, nsima na Ye kobikisa yo, kasi akoki koyeisa mikolo na yo mokuse awa, mpe kofutisa yo mpo na masumu nyonso osalaki. Boye, soki osali lisumu, okosengela kofuta mpo na oyo osalaki. Bóbosana yango te.

⁴⁷⁷ Sikawa, sikawa Nkolo ázala na bino. Nandimi, na mpokwa oyo, ete Ndeko Ramsey abikisamaki. Ya solo mpenza, nandimi yango. Kasi alingaki kaka kotosa Nzambe te, mpe lokola alingaki kotosa Nzambe te, Nzambe asengelaki kozongisa ye na Ndako. Yango nde likambo se moko ya kosala, mpamba te, ezalaki nini? “Alingaki koyokisa nsoni mpe kotiola Makila oyo abulisamaki na yango.” Boye te? “Mpe komona kondimana lokola eloko ya mbindo,” ezali mpenza oyo mokanda ya Baebele oyo elobi. Bomoni? Elingaki kosalema te ete ábunga, kasi alingaki koyokisa nsoni mpe kotiola, boye Nzambe alingaki kosengela kolongola ye na mabelé mpe kozongisa ye na Ndako. Yango nde mpenza likambo oyo esalemaki.

Sikawa, tika ete Nkolo ápambola, wana togumbi mitó mwa moke mpo na libondeli.

⁴⁷⁸ Sikawa, Tata oleki bulee mpe na ngolu, tozongiseli Yo matondi mingi mpo na elaka oyo tozali na yango, ete Okotika biso ata moke te, to Okoboya biso te. Olakaki ete Okotambola elongo ná biso na bomoi mobimba, mpe kati na kufa Okozala pene na biso. Olakaki biso ete tozali na Bomoi na Seko. Opesaki biso Yango ofele. Tokoki kobungisa Yango ata moke te. “Baoyo nyonso bakoya epai na Ngai, bazali na Bomoi ya Seko.” Mpe soki ezali Bomoi na Seko, Ezali na nsuka te, mpe Olakaki ete Okosekwisa biso na mokolo ya nsuka. Mpo na yango, tozongisi matondi. Tozongisi matondi ndenge Liloba na Yo elakisaka biso bongo. Epesaka biso elikia ya solo. Esalaka ete toyeba ete Tata na biso Azali Bolingo. Alingi biso, mpe Aponaki biso. Olobaki: “Bino boponaki Ngai te, kasi Ngai nde naponaki bino mpe nabongisaki bino.” Mpe natondi Yo, Tata, ete Osili kosala bongo. Mpe bato mingi bafandi awa, na mpokwa oyo, oyo basila kobongisama mpo na Bomoi na Seko, mpe basili koyamba Yesu Klisto lokola Mobikisi na bango mpenza. Mpe mbuma ya Molimo ezali kolanda bomoi na bango: bolamu, bosokemi, komikitisa, bolingo, esengo, kimia, motema molai, boboto. Tozongisi matondi mpo na yango.

479 Mpe tobondeli, Tata, ete soki moto moko azali awa, na mpokwa oyo, oyo mbuma yango ezali kolanda bango te, kasi bazali kopema likoló na mabanzo moko boye, mpo ete bamemamaki, mokolo moko, mpo batuntukaki, bamiyokaki malamú, ntango mosusu bagangaki, bakokaki kosala makambo mingi. Kasi, Tata, soki bazali na mbuma ya Molimo te, oyo ebatelaka bango mokolo na mokolo kati na bolingo ya ntango nyonso, kolimbisa banguna na bango, kobongisa mabe na bango, mpe kobika na kimia, na bolingo, na boboto mpe na bolamu bamoko na bamosusu, mpe molende mpo na Lingomba, bolingo mpo na Klisto mpe mpo na bana na Ye, E Nzambe na Seko, limbisa bango. Atako bazali bandimi ya lingomba, binamá ya nzoto oyo ya mokili, tika ete bákende sikawa mpe bábwaka misala ya nzoto mpe ya kufa, mpe bákende mbangu kino na kobonga be. Sala yango, Nkolo. Tika ete báýá epai na Ye oyo abongi be mpo báýamba Ye lokola mbondi ya masumu na bango, mpo Akoka kotelema lokola mbeka oyo ebongi be mpo na mbali oyo akweisami mpe mwasi oyo akweisami. Mpe ákoka kopesa bango ngolu na Ye ya bolingo mpe kimia, kino ete báýá liboso na Bozali na Nzambe mpo na kobika libela. Sala yango, Tata.

Wana togumbi mitó:

480 Soki ezali na moto moko oyo akolinga kobongola bomoi ya mibeko ya nzoto, ya mabátisi, ya komiyoka nzoto, ya makambo ya mike-mike ya nzoto, ndenge wana, mpo na kozua motema ya solosolo, oyo etonda na bolingo ya solosolo, mpo—mpo ókoka kopusana pembeni na monguna na yo ya mabe koleka, koyamba ye mpe koloba: “Ndeko, nakobondela mpo na yo. Nalingi yo.” Soki olingi kobongola lobiko ya makambo ya nzoto mpo na kobikela bolingo ya solosolo, okolinga kotombola loboko epai na Nzambe, mpe koloba: “Nzambe, zua ngai na mpokwa oyo, mpe kómisa ngai oyo nasengelaki kozala”? Nakobondela mpo na yo, uta na eteyelo awa. Ozali na mposa ya libondeli? Tombola loboko.

481 Nzambe ápambola yo kuna, misie. Nzambe ápambola yo, ndeko. Moto mosusu azali? Nzambe ápambola yo, misie. “Nakendaka losambo mibu ebele.” Nzambe ápambola yo, misie. Nzambe ápambola yo awa, ndeko. Nzambe ápambola yo kuna, mama moke. “Nakosenga na Nzambe ete ákómisa ngai moto ya kimia.” Oko. . . Otombokaka mpenza? Osilikaka mingi? Otiaka ntembe? Ofandaka kimia te? Omitunaka soki Ezali mpenza solo to te? Ntango oyaka epai na Klisto, oyaka na elikia nyonso, na motema etondi na bolingo? Opusanaka epai na Ye kozanga kobanga, kolobáká: “Nayebi ete Azali Tata na ngai”?

482 Mpe kokweisama ezali te, osili koleka longwa na kufa mpe koingela na Bomoi. Oyebi yango. Mpe ozali kotala bomoi na yo: olingaka, olimbisaka, ozali na boboto, ozali na kimia, ozali na bopolo. Mbuma nyonso oyo, ya Molimo, ezali kolanda bomoi na yo, mokolo na mokolo. Mpe kaka ntango osali likambo moko

ya mabe, oh, la la, kaka na ntango eyei na makanisi na yo ete osali mabe, noki-noki, obongisi yango, na mbala moko. Kozela miniti mosusu te, kende na mbala moko kobongisa yango. Soki osali yango te, boye, ozali na Molimo ya Klisto te. Okoki kozala mwasi malamumu, okoki kozala mobali malamumu, okoki kozala moto oyo bakaniselaka malamumu na lingomba, okoki kozala moto oyo bakaniselaka malamumu na bazalani na yo, kasi osili nde kokóma kino na bobongi be wana, na esika wana, epai oyo okómi kotíela Klisto motema mobimba? Mpe na nzela yango, apesi yo elembo. “Abraham andimaki Nzambe, mpe etangamelaki ye lokola boyengebene. Bongo Nzambe apesaki ye élémbo ya kokatama ngenga, lokola kondimisama.”

⁴⁸³ Sikawa okoloba: “Nandimi Nzambe. Nayambolaki.” Kasi Nzambe apesaki yo elembo ya Molimo Mosanto, na bomoi na yo, ya bolingo, esengo, mbuma ya Molimo, mpo na kotalisa polele ete obikisami? Soki Asali yango naino te, boye Andimi naino kondima na yo te. Oyambolaki kaka. Ayambi yango naino te, eloko moko ezali kotambola malamumu te. Boye, okolinga koyamba Ye? Tombola loboko, soki moto mosusu azali, liboso ete tóbondela.

⁴⁸⁴ Nzambe ápambola yo, mama moke. Nzambe ápambola yo mpe, kuna. Nzambe ápambola yo. Malamumu. Moto mosusu, liboso ete tóbondela? Malamumu. Nzambe ápambola yo, kuna, ndeko mwasi. Nzambe ápambola yo, ndeko. Nzambe ápambola yo, ndeko. Nzambe ápambola yo, ndeko na ngai. Ezali solo. Maboko soko zomi to zomi na mitano etombwamaki.

Sikawa tóbondela.

⁴⁸⁵ Nkolo Mopambolami, na bifandelo na bango, bazali na etumbelo. Ezali na bifandelo na bango, epai bafandi sikawa, nde Osololi na mitema na bango, ete bazali na “libunga.” Ezali na bifandelo na bango nde Oti mposa na mitema na bango, ete bakómi “na mposa makasi ya kozala lokola Yesu.”

⁴⁸⁶ Balingi ete bomoi na bango ébongwana. Balingi kozala bato ya kosokema mpe ya komikitisa. Balingi kozala na boboto mpe kotonda na motema molai. Balingi kozala na motema molai, na koyikanela bato mpiko. Balingi mpenza kozala lokola Baklisto, lokola Klisto mpenza, na lolenge ete mokili ekoloba, wana bazali kotambola na balabala, ete: “Mobali wana azali mpenza Moklisto. Mwasi wana azali mpenza Moklisto. Oh, bazali bato ya boboto, ya bopolo, ya bolamu koleka!”

⁴⁸⁷ Sala yango, Nkolo, ete bábikela likambo yango, na mpokwa oyo. Mpe tika ete bápema likoló ya makoki ya lingomba na bango te, likoló ya kozala bato ya lingomba moko boye te, ya denomination moko boye te; to mpe likoló ya kotuntuka na bango te, likolo ya mabanzo moko boye te, ndakisa kotuntuka to likambo moko oyo esalemaki; ntango mosusu bagángáki, balobaki minoko na sika, to eloko mosusu.

488 E Nzambe na Seko, tika ete bámeke kotia motema te ete bakokóma na Lola likoló na yango, mpo tomóná yango mbala mingi kokwea mpenza. Mpe Olobaki ete ekokwea: “Ézala minoko na sika, ekosila! Epai lisakoli ezali, ekolimwa. Epai boyebi ezali, ekolimwa. Oh, epai biloko nyonso wana ezali, ezala makabo, bikamwiseli ya kobikisa babeli, nyonso wana ekosila. Bobele bolingo na Nzambe nde ekoumela.”

489 Nzambe, kela yango kati na mitema na bango, mpe tika ete báyebe ete Molimo nde abotaka mbuma. Sala yango sikawa, Nkolo, wana tozali kotalela Yo, mpamba te tosengi yango na Nkombo na Yesu. Amen.

490 [Maloba mazangi na eteni oyo ya bande—Mok.] ... mabungútulú ya móto kopumbwa, mpe komona bibenga kokende mpe kozonga kati na ndako oyo, komona Klisto koya na nzúbe na maboko na Ye, mpe na oyo ya Ye. . . Oh, boyebaki ete ezali misala ya motemeli na Klisto? Alobaki: “Ntango makambo yango ekobanda kosalema, na bongo bótombola mitó, lisiko na bino elingi koya.” Na bongo, yango wana nalingaka koya mbangu na losambo, na miniti nyonso oyo nakoki koya, mpo na kokémbisa bino. Ntango mosusu Ndeko Neville akozala na biso ntango nyonso te. Nandimi ete Ndeko Neville azali molakisi malamau mpenza, ya Nsango-malamau. Toyebi te eloko nini ekomikotisa kino na eteyelo oyo, mpe, ntango kosalema: “Bampate na Ngai bayebi Mongongo na Ngai.” Bókangama na Liloba yango. Bómeke kotika Liloba yango te. Bókangama na yango. Bótelema ngwi kati na bonsomi epai oyo Klisto akomisi bino nsomí. Bókangama te na bikanganelo nyonso wana ya boombo mpe bongo na bongo. Bótelema ngwi, mpe bózala nsómí. Nzambe akopambola bino. Tozali na eloko moko te ya kobanga na mokili.

491 Bomitunaka ntango nyonso. Namonaka bato koya mpo tóbondela mpo na bango, bamikotisaka na molongo. Mbala ekoya, ntango bakomona mayangani ya kobondela mpo na babeli, bakotaka molongó *oyo*, bakotaka na molongó *oyo*. Nakweisaka bango te. Balukaka ete mpasi na bango ésíla, kasi balandaka nzela ya mabe. Bosalaka bokeseni, oyo Nzambe alobi ete bósala te. Bomoni? Ntango opusani na mpiko nyonso na Ngwende ya ngolu, mpe ondimi ete: “Okozua oyo osengi,” kangama na Yangu. Basalaka nde ndenge wana; ezali te longwa na losambo moko kino na mosusu, longwa na lingomba moko kino na mosusu, longwa na liyangani moko kino na mosusu.

492 Ee, bakomisaka mayangani ya kobondela mpo na babeli oyo lokola eloko ezanga ntina. Ya solo mpenza. Ekómi na esika moko oyo, bato ya mayele, bakomi kotala zinga-zinga mpe komituna oyo nyonso yango ezali. Kuna, Nzambe alingaka makambo wana te. Lobiko na nzoto esengeli kaka kosalema na mayangani te. Lobiko na nzoto esengelaki kosalema na losambo nyonso, makabo nyonso oyo esengeli kosala. Kasi bólekisa ndelo na

makabo wana te. Bótiaka bokebi na likabo te. Soki Nzambe alingi kosalela yo na likambo moko, Akosala yango. Kasi, bólukaka nde Mopesi.

⁴⁹³ Martin Luther, mokolo moko, nsima na koloba minoko na sika, batunaki ye mpo na nini azalaki koteya yango te, alobaki: “Soki natei yango, bato na ngai bakolanda likabo na esika ya Mopesi.” Ezali solo.

⁴⁹⁴ Moody, mokolo moko, azalaki koloba, mpe abandaki, wana azalaki koteya na nsé ya mpemela, alobaki minoko na sika. Alobaki: “Nzambe, limbisa ngai ndenge nalobi-lobi maloba ya bolémá.” Ya solo mpenza. Bomoni? Mpe bazalaki na makambo yango. Tondimaka makambo yango, kasi esengeli kotياما na esika na yango. Esengeli kotياما lokola ba-ndanga te.

⁴⁹⁵ Eloko ata moko te etikali na Biblia, lokola “ndanga ya Molimo Mosanto”, bobele mbuma ya Molimo. Bóluka esika moko, oyo Yesu alobaki bongo. Iyo, misie. Ndanga ya Molimo Mosanto ezali mbuma ya Molimo na yo. Yesu alobaki bongo: “Bokoyeba bango na mbuma na bango.” “Mpe mbuma ya Molimo ezali bolingo, esengo, kimia, motema molai, bolamu, kimia, boboto, bopolo. Mpe mbuma ya monguna ezali likunya, koyina, mayele mabe, kowelana, mpe bongo na bongo; yango nde mbuma ya monguna.” Boye, okoki koyeba yango na lolenge ozali kobika, epai oyo otelemi ná Nzambe. Soki motema na yo mobimba elingi Ye, mpe olingi Ye mpe ozali na boboto mpe ozali kobika elongo na Ye mokolo na mokolo, oyebi ete osili koleka longwa na kufa kino Bomoi. Soki ezali bongo te, mpe ozali ndenge mosusu, ozali kaka komekola Moklisto moko. Ya solo. Nzoka nde komekola nyonso ya nzoto ekotalisama solo mpenza na mpwasa. Toyebi yango.

⁴⁹⁶ Na bongo, kobika bomoi ya lolenge wana te, otindami te. Mpo na nini okondima eloko mosusu, na ntango oyo mapata mobimba etondi na biloko ya malamumu mpe ya solosolo? Na ntembe te. Bótika ngai názua Nzambe, yango nde oyo ngai nalingi. Amen.

⁴⁹⁷ Sikawa, moto moko ayaki mpo tóbondela mpo na ye? Soki ozali, tombola loboko. Tozalaki na liyangani ya kobondela mpo na babeli na ntongo ya lelo. Nabanzi, na bongo. . . Madame oyo awa? Malamumu, ndeko mwasi, okoki koya liboso? Mpe ndeko na biso, mpaka, awa, yaka sikawa mpo na kopakola bato mafuta. [Maloba mazangi na eteni oyo ya bande—Mok.]

. . . ngengela ngai;
Oh, ngengela ngai, Nkolo, ngengela ngai,
Tika ete Pole uta na ndako ya mwinda
éngengela ngai.

⁴⁹⁸ Azali malamumu mingi, boye te? Tógumba mitó, na kimya nyonso sikawa. Mpe, *Ngengela Ngai*, lisusu. Sikawa, tokei sikawa, biso nyonso, ete: “Ngengela. . .” Kumbamela Ye na

elimo na yo sikawa, bomoni, na kimia. Eteni ya kobondela mpo na babeli elingi kobanda. Liteya esili. Tókumbamela.

Tika ete Pole uta na ndako ya mwinda
éngengela ngai;
Oh, ngengela ngai, Nkolo, ngengela ngai.
Tika ete Pole uta na ndako ya mwinda
éngengela ngai.

Kozala lokola Yesu, kozala lokola Yesu, (Oh!)
Na mokili, nalingi kozala lokola Ye;
Na mobembo mobimba ya bomoi, uta na mokili
kino na Nkembo,
Nasengi bobele ete názala lokola Ye.

Tokotambola kati na Pole, Pole ya kitoko
mingi,
Epai matangá ya mamwe ya mawa ezali
kongenga;
Kongenga zinga-zinga na biso, butu-moi,
Yesu, Pole ya mokili.

Bino nyonso basantu ya Pole bótatola,
Yesu, Pole ya mokili,
Na bongo ba-ngona ya Lola ekobeta,
Yesu, Pole ya . . .

Yamba biso, Nkolo, wana tozali kokumbamela Yo.

Tokotambola kati na Pole, Pole kitoko,
Epai matangá ya mamwe ya mawa ezali
kongenga;
Kongenga zinga-zinga na biso, butu-moi,
Yesu Pole ya mokili.

⁴⁹⁹ Bolingaka koníkama yango, boye te? Bozali komiyoka malamumu? Tombola loboko, talisa yango. Ba-nzembo yango ya kala ezalaka na eloko moko boye, ba-nzembo ya ntango ya kala, malamumu kutu názala na yango koleka ba-nzembo ya sika oyo, lokola ya mokili, oyo ekoti na mangomba ya Baklisto. Ngai nalingaka oyo ya ntango ya kala, nalingaka yango.

Yesu, batela ngai pene na ekulusu, (Oh la la!)
Epai liziba ya motuya,
Ya ofele mpo na moto nyonso, libeke ya lobiko
na nzoto,
Ezali kotiola uta na liziba ya Kalvari.
Na ekulusu, na ekulusu,
Oo, zala nkembo na ngai mpo na libela;
Kino ntango elimo na ngai oyo enetolami
Ekopema na ngámbo ya ebale.

⁵⁰⁰ Nakokaki kotika mokili na pete mingi, wana ezali koyembama, bino mpe, boye te? Malamumu mingi mpenza! Ekati nde makambo nyonso? Boyebi, nazali na esengo ndenge

nasila kokata makambo nyonso, bino mpe, boye te? Nyongo mobimba ya kala esila kofutama, kala mpenza. Nayebisaki Ye: “Nkolo, nalingi mindondo te na ebale. Na—nalingi kondimisama sikawa.” Nalingi koyeba Ye. Nalingi koyeba Ye.

⁵⁰¹ Libulu monene moko, ya molili, etiami liboso ya moko na moko na biso. Tozali kokende na nzela yango. Mbala nyonso motema na biso ebetaka, tozali kopusana se kopusana pene koleka. Kasi ntango nakokóma wana, nalingi kolenga te lokola moto na kobangabanga, nalingi nde komizipa na bilamba ya boyengebene na Ye, kokóta kati, koyeba ete: “Nayebi Ye na nguya ya lisekwa na Ye.” Ete, ntango Akobenga, nakobima kati na bakufi.

Na ngai . . .

⁵⁰² *Kondima Na Ngai Etalesi Yo*, toyemba yango sikawa.

Kondima na ngai etaleli Yo,
Yo Mwana-mpate ya Kalvari,
E Nzambe Mobikisi;
Sikawa yoka ngai wana nazali kobondela,
Longola masumu na ngai nyonso,
Kotika te ete nábunga
Mosika na Yo.

⁵⁰³ Sikawa, Molakisi monene, ndenge Olakisaki biso na Liloba na Yo ya malamau mingi, mitema na biso ezali mpenza kolenga, na ngolu ya konetolama, koyeba ete tolongwe na kufa mpe koi ngela na Bomoi. Nyonso wana, na bolamu ya Nkolo na biso Yesu, Oyo abengaki biso, mpe asukoli biso na Makila na Ye, mpe atalisi biso liboso ya Ngwende ya Nzambe, kozanga mabe, kozanga mpaméla, mpo Azuaki masumu na biso. Tozali na masumu te. “Nzambe atiaki masumu na nko na biso likoló na Ye, mpe Azokisamaki mpo na mabe na biso.” Oh, tolingi Ye mingi, Mwana-mpate monene ya Nzambe!

⁵⁰⁴ Mpe tobondeli, Tata, ete Ópesa biso elobeli malamau, maloba, mpo tókoka koyebisa bamosusu, mpo bango mpe bákoka koyeba Ye, mpe kolinga Ye, mpo Ye alingi bango. Pesa biso ngolu yango.

Mpe totondi Yo, Tata, mpo na bana oyo bauti kobotama, oyo bauti koya na Bokonzi ya Nzambe. Tika ete bámona losambo moko ya malamau na esika moko, epai na bango, mpe básalela Yo kuna kino ete kufa ekokangola bango na nzoto ya kala oyo, ya mpasi mpe minyoko, mpe talisa bango liboso na Ye, kozanga mabe, kozanga mpaméla, na eleko ekoya, ná Bomoi ya Seko. mpamba te tosendi yango na Nkombo na Ye. Amen.



BAEBELE, MOKAPO YA MOTOBA 2 LIN57-0908E

(Hebrews, Chapter Six 2)

MATEYA LIKOLO NA BUKU YA BAEBELE

Liteya ya Ndeko William Marrion Branham oyo, eteyamaki liboso na Anglais mokolo ya Lomingo na mpokwa, mwa 8, na sanza ya Libwa, na mobu 1957, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiama na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org